


ANG DIOS NGA MADAGAYAON SA KALOORY

 Mahimo na kamong manglingkod. Ako'y . . . o dalidali ko, nga misulod ug nakita ko si Igsoong Moore ug silang tanan nga ania sa entablado, mga higala nga kaila ko na sulod sa daghan nang mga katuigan. Usa gayud ka pribilihiyo nga makita sila nga ania dinhi karong gabhiona. Medyo mibati ko og pagkagamay nga motindog dinhi ug mamulong uban ang mga teologo nga ania sa akong luyo, ug mahimo nila akong koreksyonan kon masayup man ko. Hinaut unta.

² Malipayon gayud kita karong gabhiona nga makauban ang usa ka tawo dinhi, si Igsoong babayeng Rose. Sa pagbiyahe namo paingon dinhi . . . nakauban ko si Igsoong Shores ug ang iyang kaabag, karong adlawa, sa usa ka diyutay'ng paniudto. Ug sa anaa pa kami sa dalan, miingon si Igsoong Williams nga nagmasakiton kaayo kono si Igsoong Rose. Ug mao nga miadto kami aron duawon siya sa makadiyut, og miluhod kami. Ug taas kaayo ang iyang hilanat, ug grabe gyud ang gibati. Nagampo kami og diyutay, ug ang Ginoo nakigsulti kanamo, ug miingon, "Mamaayo siya." Miingon, "Mamaatua na siya didto ugma sa gabii," ingon nila. Ug ania na siya karong gabhiona, nga nagalingkod dinhi mismo. Husto kana.

³ Igsoong Rose, tumindog ka sa makadiyut, aron nga sila . . . Mapasalamaton kita sa Ginoo. Naghigda na lang kono siya. Ingon niya, "Gitumba gayud ako sa—sa yawa. Mianhi ko ug basta na lang nalup-og," usa ka matang sa sakit sa tutunlan, ug uban pa. Apan gitabangan gyud siya sa Ginoo, busa malipayon kita tungod niana. Nagapasalamat gayud kita sa mahal nga Ginoo!

⁴ Bueno nagkaaduna kita og maanindot nga kahigayonan. Ug ugma sa gabii, diay, didto na 'ta sa—sa Ramada. Ug ayaw n'yo kalimti ha, nga wala na'y pagpahigayon dinhi ugma sa gabii, didto na man 'ta sa Ramada. Ug magsugod ang konbensyon pagkasunod gabii. Mao nga kinahanglan n'yong pagpasensyahan ako og usa pa ka gabii, kabalo na mo.

⁵ Ug kagabii ako—milapas gayud ako sa oras, ngani nagsaad na ko sa akong kaugalingon nga, sa pagsugod sa tuig, pamub-an ko na ang akong mga Mensahe gikan sa tulo o upat, lima ka oras, ngadto sa mga traynta o kuwarenta minutos na lang. Ug sumala sa akong gisulti kaninyo kagabii, nagkomentaryo kanako ang akong asawa niadtong Dominggo, miingon, "Maayo gayud ang imong gibuhat." Pero—pero, sa tinuod lang, naningkamot man ko kagabii ug milapas gyud gihapon, kita n'yo. Tungod miabot

man gud ko og singkwenta'y-singko minutos, imbis nga traynta minutos ra unta, kagabii.

⁶ Sa pagpaingon namo dinhi, niining gabhiona, miingon si Billy, "Unsa ma'y imong pagahigsotan karon?"

⁷ Ingon ko, "Bueno, duna man ko'y pipila ka mga sinulat dinhi, ug pipila pud ka mga Kasulatan. Wala pa ako mahibalo, sa pipila niining, upat o lima ka managlahi nga mga Mensahe." Ingon ko, "Mahibaloan ko ra inig abot nako didto, ug tan-awon kung unsa ma'y mahitabo."

⁸ Miingon, "Nagsaad baya ka nga iampo mo ang tanang mga masakiton."

Ingon ko, "Oo, sir. Pila ba ka mga kard ang imong gidala?"

Miingon, "Duha ka gatus."

Ingon ko, "Mas maayo nga sugdan ko na kana, karong gabhiona."

⁹ Ug ingon siya, "Pero timan-i, nga aduna lang baya ka'y kinse minutos para mamulong." Ingon pa, "Gigamit man gud nimo ang tanang oras kagabii." [Nangatawa sila Igsoong Branham ug ang kongregasyon—Ed.] Mao nga kinahanglan gyud diay natong magdali, dili ba?

¹⁰ Bueno, nagsaad man 'mi kaninyo, nga igaampo namo kadtong aduna na'y mga prayer kard, ug kami'y—obligado kami sa maong saad, siyempre. Pero dili man nato mahimo nga ipaapil silang tanan diha sa linya, ug dili ko usab mahimong pagatawgon sila tagsa-tagsa, gikan dinha sa mga mananambong. Bisan pa kon itugot kana kanako sa Balaang Espiritu, ako—dili ko mahimo kana. Dili ko gayud makaya kana. Ug, apan nasayod na man kitang tanan nianang mga butanga. Nasayod sab kita nga ang Dios gayud Dios gihapon hangtud karon. Dili kana mao ang nagaayo. Kondili nagapalig-on lang kana sa pagtoo, aron nga masayran nato nga—nga anaa kita sa Iyang Presensiya.

¹¹ Ug igaampo nato, karong gabhiona, ang tanang mga masakiton, ang matag usa kanila nga aduna na'y mga prayer kard, aron maiampo. Ug dayon ugma sa gabii, didto sa Ramada, paningkamotan namo nga makapanghatag og dugang pa niana ug sugdan usab silang iampo didtong dapita, tungod anaa pa man ko ugma sa gabii. Ug sa hunahuna ko aduna ko'y usa pa ka gabii para sa konbensyon, og tingali'g usa ka pag-pamahaw usab. Nagadepende ra kung unsay resulta sa mga butang.

¹² Aduna diay usa, usa sa mga mamumulong nga wala pa ka makaabot; wala pa makaabot karon, wala pa gyud siguro. Si Igsoong Humburg, o kana ba'y. . . [Usa ka igsoong lalaki ang nagaingon, "Amburgy."—Ed.] Amburgy, Amburgy, si Kash Amburgy. Ug ako—sayup ang akong pagkasulti niana, tungod German man gud kana nga ngalan. Ako—nagatoo ko nga German gyud kana. Busa tingali'g mopuli lang usá ako, para

kaniya, sama sa tawag nato niini, pasayloa ko sa maong sinultihan.

¹³ Bueno nagkaaduna gyud kita og maanindot nga kahigayonan diha sa Ginoo, bisan pa man. Kaninyong tanan, kung aduna ma'y pipila ka mga estranyo nga ania dinhi karong gabhiona, malipayon gayud kami nga makauban kamo, ug nagasalig kami nga ang Ginoo magapanalangin kaninyo. Ginaampo ko nga wala na'y si kinsa man nga tawong masakiton nga ania sa bilding pagmanguli na kita niining gabhiona, og moanhi unta ang atong Ginoo diha sa Iyang dakung gahum ug ayohon ang tanang mga may sakit ug nagaantus.

¹⁴ Dinhi usa ka higayon kaniadto, nagadawat ako og mga tawo para sa espesyal nga mga pagpakighinabi, sa pipila ka malisud nga mga kahimtang nga dili na namo maatiman. Dayon nagkadaghan kini sa ingon ka paspas, hangtud nga, padayon kining gipanalanginan sa Ginoo, og hangtud nga nagkaaduna kami og tulo o upat ka gatus nga nagahulat pa, ug mao nga duna usab og mga tawo nga mahiubos tungod kay maghulat pa man sila. Tingali'g, sa hataas nga panahon, kinahanglan nilang maghulat og usa o duha ka tuig, aron nga makasulod niini, kita n'yo, sa taliwala sa mga panagtigum, aron maatiman sila diha sa mga pagpakighinabi. Ug manglingkod lang 'mi ug maghulat sa Ginoo hangtud nga isulti Niya kanamo sa eksakto kung unsa gyud ang maong kahimtang.

¹⁵ Walay pagduhaduha nga adunay mga tawo nga nagalingkod dinhi karong gabhiona nga anaa niadtong espesyal nga mga pagpakighinabi. Aduna ba? Ipataas n'yo ang inyong mga kamot. Ang mga anaa niadtong espesyal nga mga pagpakighinabi. Oo, anaay nagalingkod, dinha, ug nasayod nga husto kana. Nagahulat lang kami nga masayran kung unsa ma'y igasulti sa Ginoo, kung unsa ang maong kahimtang. . . Ug pagkahuman gikinahanglan ko nang undangon kadto usa ka higayon. Gisultihan ko si Billy nga dili na kami makapahigayon og personal nga mga pagpakighinabi.

¹⁶ Kita n'yo, ako—ako—bag-o lang ako milagpas og bayntesingko, bag-ohay pa lang, sa ikaduhang higayon, ug nagapaingon na usab sa pang-ikatulo ka higayon. Ug samtang nagakatigulang ka na, aba, dili ka na, ikaw. . . sa unsa mang paagi dili mo na mapapadayon ang imong naandan nang ginabuhat kaniadto. Ang imong mga lakang nagakamubo na. Ug—ug, siyempre, si Igsoong Moore wala pa ma'y hibangkaagan bahin niana. Siya. . . sa hunahuna ko halos magka-edad ra man kami.

¹⁷ Apan daghan na gyu'y tubig ang midagayday sa suba sukad niadtong, nakaanhi kita dinhi ni Igsoong Brown sa unang higayon, uban si Igsoong Outlaw ug si Igsoong Garcia, ug si Igsoong Fuller. Nahunahuna ko kung ania ba kaha sila nga mga

kalalaken-an karong gabhiona? Si Igsoong Garcia, si Igsoong Fuller, si Igsoong Outlaw, ania ba sila? Ipataas ang inyong mga kamot kung ania man kamo dinhi. Oo, anaa diay si Igsoong Fuller, nagatoo ko, kung wala ko masayup. Si Igsoong Outlaw ania dinhi dapit. Si Igsoong Garcia pud, ako—sa hunahuna ko bisan og mibiya na siya sa Phoenix. Nagatoo ko nga husto kana. Siya—mibiya na siya sa Phoenix, ug didto na siya sa California. Bueno, halangdon gayud kadto nga mga adlaw, ug hangtud karon nagatoo gihapon ako sa mao ra nga Mensahe nga akong nabatonan kaniadto, “Si Jesus Cristo mao sa gihapon kagahapon, karon, ug hangtud sa kahangturan.” Siguro kadto’y mga . . . Bueno, bata pa gani kaniadto si Becky. Mga dise-nuebe na gyud kadto ka tuig.

¹⁸ Ug karon siya’y daku na, hamtong, tambokon, pangit nga dalaga nga nagalingkod dinha sa kon asa man, dise-nuebe anyos na ang panuigon. Asa man ka, Becky? Aba, iya gyud kong silotan tungod niini. Mahinumduman ko pa nga ginakugos ko siya kaniadto. Siguradong maglisud na gyud ko kon buhaton pa kana karong gabhiona.

¹⁹ Mahinumduman ko pa didto sa simbahan ni Igsoong Garcia usa ka gabii kaniadto, siya’y gamay pa nga bata. Ug miingon ko, “Aduna kita og pang-tibuok kalibutan nga panagtigum karong gabhiona.” Miingon ko, “Nagapakigsulti ako karon sa inyo nga mga Katsila.” Ug ingon ko, “Ang akong asawa nga ania dinhi usa ka German.” Ingon ko, “Usa ako ka Irishman.” Ug miingon ko, “Ug ang akong batang babaye usa pud ka Indian,” ug si Becky kadto.

²⁰ Mao nga paggawas ko sa luyo nga pultahan, dihay usa ka Mexicana nga batang babaye didto, nga miingon, “Igsoong Branham!”

Ingon ko, “Oo, palangga, unsa ma’y imong gusto?”

Miingon, “Dili ba ang imong anak medyo luspad ra man, nga mamahimong usa ka Indian?” Bulagaw baya siya, kabalo na mo.

Ug miingon ko, “Siya’y usa ka Indian sa iya lamang linihokan.”

²¹ Bueno, mapasalamaton kita, nga, maania dinhi pag-usab karong gabhiona. Karon sa dili pa kita moduol sa Pulong, moduol usá kita Kaniya, kay Siya man ang Pulong. Sa diha nga napadayag ang Pulong, Siya mao kana nga anaa kaninyo.

²² Sa dihang gihisgotan nato kagabii ang mahitungod sa *Ang Binhi Sa Kasukwahan*, nagustohan ba ninyo, ang mao nga panalangin sa Ginoo? [Nagaingon ang kongregasyon, “Amen.”—Ed.] Ako—gikalipay ko gayud ang paghatud sa Mensahe nganha kaninyo. Ug hingsayran na nato kung unsa gyud kana nga mga binhi.

²³ Karon aduna ba'y espesyal nga paghangyo niining gabhiona, usa ka butang nga espesyal gayud? Mahimong ang pipila kaninyo nga mahiapil niining linya sa pagpaampo, moingon, "Dios, malooy Ka. Sa diha nga moduol na ako aron maiampo, ipataas ang akong pagtoo aron matagbo ko ang mga kondisyon." Ug—ug tingali'g dunay si kinsa man nga may usa ka minahal sa kinabuhi, nga masakiton, ug ingon niana. Mahimo n'yo bang ipataas ang inyong kamot aron modungaw ang Dios ug moingon. . . . Karon kung kana. . . . Kung nasayod lang kamo kung unsa ang pagpabati niana kanako pagmakita kana. Tan-awa lang ninyo ang mga panginahanglanon dinhi! Mga igsoong ministro, tan-awa lang ninyo kana. Kita n'yo? Bueno, kung nagapabati kana kanako og ingon niana, unsa pa kaha sa atong Amahan? Sigurado gayud.

Karon mag-ampo kita.

²⁴ Minahal nga Jesus, nagaduol kami karon sa dakung Trono sa kalooy, pinaagi niining Ngalan nga may-kasarang-sa-tanan. "Kay wala na'y laing Ngalan nga gihatag sa mga tawo aron kami maluwas, kondili kining Ngalan lamang ni Ginoong Jesus." Ug mao nga nagaduol kami diha sa Iyang Ngalan. Ug ginaampo namo, Langitnong Amahan, nga dawaton Mo unta kami, karong gabhiona, ingon nga Imong nagatoo nga mga anak. Ug pasayloa kami sa among dili-pagtoo, Ginoo. Tabangi nga karong gabhiona, mamahimo namong bug-os nga toohan ang matag Pulong sa Dios niining gabhiona, para sa tanang mga butang nga among gikinahanglan.

²⁵ Nasayod Ikaw kung unsa ang anaa sa luyo niining mga kamot nga naipataas; aduna og may balatian, ang uban kanila tingali'g may mga problema sa panimalay, ang uban kanila may mga problema sa pinansiyal, ang uban kanila usab gipangbudlayan, ang uban tingali'g mga nag-backslide na, og ang uban mga makasasala. Unsa man ang maong panginahanglanon, wala gayu'y dag-anan Kanimong ang bisan unsa nga kaaway. Busa ginaampo namo, Ginoo, nga—nga karong gabhiona, maila namo nga ang among mga kaaway, ang tanan, nabuntog na, bisan ang kamatayon mismo. Ug mao nga kami'y labaw pa ka mga mananaug diha Kaniya Nga—Nga naghigugma kanamo ug nagtugyan sa Iyang Kaugalingon alang kanamo, og naghugas kanamo pinaagi sa Iyang Dugo.

²⁶ Ginaampo namo, Ginoo, nga ang tanang dili-pagtoo, ang tanang pagduhaduha, ang tanang kalibog, ang tanan nga dili-nahisama sa Dios, mokalagiw gikan kanamo karong gabhiona, aron ang Espiritu Santo magkaaduna gayud og katungod sa among mga kasingkasing. Hinaut nga magpakigsulti Siya kanamo sa usa ka misteryoso nga paagi. Hinaut nga magpakigsulti Siya kanamo pinaagi sa Iyang Gahum. Hinaut nga Iyang buhion pag-usab ang mga—mga patay na sa espirituwal, ibalik ang maayong panglawas alang niadtong

mga may sakit ug nagaantus, lig-onon ang maluyahon nga mga tuhod, og ang gikapoyan nga mga kamot nga nanghuyhoy na. Ug hinaut nga magkaaduna gyud og higayon sa kalipay.

²⁷ Hinaut nga mahitabo karong gabhiona, Ginoo, nga mobiya kami niini nga dapit paingon sa Ramada Inn, ug sugdan ang usa sa pinakamahimayaon nga mga konbensyon nga gipahigayon dinhi niini nga siyudad. Ginoo, sa higayon nga kami magkatigum ug mag-ampo! Miingon Ka, “Kung ang katawhan nga gihinganlan sa Akong Ngalan, magatigum sa ilang mga kaugalingon ug mag-ampo, nan Ako magapatalinghug gikan sa Langit.” Dios, ginaampo namo nga mamaingon gayud kini, karong gabhiona.

²⁸ Karon, Amahan, samtang magabasa kami sa Pulong, walay si kinsa man nga makahimo sa paghubad Niini kondili Ikaw lamang, Ikaw man mao ang Kaugalingon Mong tighubad, ug ginaampo namo nga hubaron Mo unta para kanamo ang mga butang nga among pagabasahon karong gabhiona. Kay amo kining ginapangamuyo sa Ngalan ni Jesus. Amen.

²⁹ Karon daghan kaninyo nga gustong isulat ang mga Kasulatan nga ginabasa sa usa ka ministro. Ug gusto ko nga mopakli kamo, karong gabhiona, sa Mga Taga-Efeso, kung mahimo n’yo.

³⁰ Ug naghisgot ako niadtong miaging Dominggo mahitungod sa Mga Taga-Efeso, kung unsa nga ang Basahon ni Josue mao ang Mga Taga-Efeso sa Daang Tugon, ug kung unsa nga usa kini ka Basahon sa katubsan.

³¹ Ug ang katubsan adunay duha ka managlahi nga bahin: ang “paggawas” ug ang “pagsulod.” Una, kinahanglan nimong mogawas. Gusto man gud sa ubang mga tawo nga dalhon usab ang kalibutan uban kanila; apan kinahanglan mo gayud nga mogawas gikan sa kalibutan, aron makasulod kang Cristo. Kinahanglan mo una nga mogawas gikan sa dili-pagtoo, aron makasulod sa pagtoo. Kinahanglan wala gyu’y ni usa ka butang nga mobabag sa imong dalan. Aron magkaaduna gayud og tinuod nga pagtoo, kinahanglan mo unang bug-os nga biyaan ang tanan-tanan nga sukwahi sa Pulong sa Dios, biyaan, aron makasulod sa pagtoo.

³² Ug ang Basahon sa Mga Taga-Efeso diha sa Daang Tugon, mao ang Josue. Kon diin, girepresentar ni Moises nga ang kasugoan, dili makaluwas ni kinsa man; kondili ang grasya lamang, ug dinhi ang *Josue* mao ra nga pulong sama sa Jesus, “Jehova’ng-manluluwas.”

³³ Ug dayon sa karon, hingsayran nato nga nahidangat diay kita sa usa na usab ka Mga Taga-Efeso, lahi nga Efeso sa pagka-karon. Diin, tungod, nga ang atong intelektuwal nga mga denominasyon ug uban pa, ug ang tanan natong mga programang pang-edukasyon midangat man sa ilang-ilang

Jordan, mao nga kinahanglan magkaaduna pud kita og usa—usa ka Mga Taga-Efeso pag-usab. Kinahanglan natong magkaaduna og usa ka exodo, aron “mahigawas” ug aron “makasulod,” para sa Pagsakgaw.

³⁴ Bueno mobasa kita karong gabhiona gikan sa ika-2 nga kapitulo sa Mga Taga-Efeso. Gisulti ko lang kana aron nga moadto kamo sa maong—maong bahin, o mopakli na ngadto sa maong kapitulo.

Kamo, ug kamo iyang gihatagan og kinabuhi, sa mga patay pa kamo tungod sa mga kalapasan ug kasal-anan:

Nga kanhi mao ang inyong panaggawi uyon sa paagi niining kalibutana, uyon sa principe sa kagamhanan sa hangin, sa espiritu nga karon nagapamuhat diha sa mga anak sa pagkadili-masinulondon:

Nga sa taliwala nila nanagkinabuhi usab kitang tanan kaniadto diha sa mga pangibog sa unod, nga nanagbuhat sa pangandoy sa unod ug sa hunahuna; ug busa sa kinaiya mga anak sa kaligtogot, bisan ingon usab sa uban.

Apan ang Dios, nga madagayaon sa kalooy, tungod sa iyang dakung gugma alang kanato,

Bisan sa mga patay pa kita tungod sa atong kasal-anan, Iya gyud kitang gihatagan og kinabuhi uban Kaniya, o, gihatagan kita og kinabuhi uban kang Cristo, (pinaagi sa grasya kamo gayud nangaluwas;)

³⁵ Gusto ko nga mokuha dinha og pipila, o bahin lang sa maong bersekulo, “apan ang Dios,” *Ang Dios Nga Madagayaon Sa Kalooy.*

³⁶ Gusto ko nga inyong matikdan dinhi ang propeta, ang apostoles, diay, nga si Pablo, nga mao’y—mao’y, kon giunsa niya paghisgot mahitungod niini, nga, “Kamo Iyang gihatagan og kinabuhi, sa mga patay pa kamo. Kamo Iyang gihatagan og kinabuhi, sa mga patay pa kamo, patay tungod sa kasal-anan ug mga kalapasan; nga nanaggawi uyon sa mga butang sa kalibutan, sa pangibog sa unod, ug nanagtuman sa pangandoy sa hunahuna. Nga . . .”

³⁷ Unsa ma’y nagpahinungdan niini nga kausaban, nakita n’yo? Ug unsa ba’y nagpahinungdan niining, “gikan sa pagkahimong patay kaniadto,” ngadto sa nahatagan-og-kinabuhi? Ang *nahatagan-og-kinabuhi* nagakahulogan og “gibuhi.” Adunay kausaban, gikan sa kamatayon ngadto sa Kinabuhi. Wala na’y laing, wala na’y laing butang nga mahitabo ngadto sa bisan kinsa nga tawo, nga ingon ka mahimayaon, sama sa pagbalhin kaniya gikan sa kamatayon ngadto sa Kinabuhi. Ang usa ka tawo, kung naghimalatayon man siya, sa pisikal, ug mamaayo pa sa pisikal, usa gyud kana ka mahimayaon nga butang, apan

wala na gayu'y ingon ka mahimayaon sama sa higayon nga siya'y patay na sa esprituwal ug unya gihatagan siya sa Dios og Kinabuhi.

³⁸ “Kamo, kaniadto, mga patay pa.” Mga patay pa man kamo kaniadto. Gani daghan man nga ania dinhi karong gabhiona, sa usa ka higayon, ang makadumdum ug nasayod nga mga patay pa kamo kaniadto. Apan karon nganong dili na man mo mga patay niining gabhiona, maingon sa kung unsa kamo kaniadto? Hinoon takus man kamo nga mamaingon niana kaniadto, tungod kay kamo makasasala man kaniadto, “apan ang Dios Nga madagayaon sa kalooy.” Mao kana—mao kana ang importante, “ang Dios Nga madagayaon gayud.” Tungod sa tanang mga butang kung unsa kita kaniadto, “apan ang Dios”! Mao kana ang nagpahimo sa kausaban dinha mismo, “ang Dios Nga madagayaon sa kalooy”!

³⁹ Oh, malipayon kaayo ako tungod niana, nga Siya'y madagayaon gayud sa kalooy. Kung madagayaon ra Siya sa salapi, kung madagayaon ra Siya sa mga materyal nga butang, ingon nga Siya mao man, apan bisan pa niana ang pinakamahimayaong butang mao gyud ang Iyang pagka-madagayaon sa kalooy. Oh, pagkadaku nga pulong kana, kung unsa nga kita mga patay pa kaniadto.

⁴⁰ Ug naghisgot pud kita sa miaging gabii mahitungod sa kung unsa nga ang binhi kinahanglan mamatay. Ug ang tanan nga nakaputos nianang binhi sa kinabuhi kinahanglan dili lamang mamatay, kondili madugta usab. Kay kung dili kana madugta, dili sab kana mahimong mabuhi. Tungod ang *pagkadugta* mao man ang, “bug-os nga pagkawala; tapos na.” Ug pagmoabot na kita sa punto nga ang kaugalingon natong mga ideya ug ang kaugalingon natong panghunahuna bug-os na gyud nga nawala ug nadugta na kanato, nan ang binhi sa kinabuhi hinay-hinay na pud nga mabuhi.

⁴¹ Karon—karon mahimo kita, mahimo ako nga maghisgot og diyutay'ng doktrina dinhi, nga dili ko. . . Kung dili kamo motoo niini, okey lang. Okey lang gayud. Pero nagatoo ako niini. Nagatoo ko nga—nga ang tawo, sa diha nga mahimugso siya niining kalibutana, sa diha nga usa ka pa ka masuso, nga nahimugso sa kalibutan, dili ka mahianhi dinhi nga wala nahibaloan-nang-daan sa Dios, tungod Siya'y walay-kinutoban ug nasayod Siya sa tanang mga butang. Ug sa diha nga mahimugso sa kalibutan ang bata, aduna gyu'y usa ka butang diha nianang bata. Kung magkaaduna man siya og Kinabuhi, nan aduna na'y gamay'ng butang dinha, sa kinasuloran nianang bata, nga siya'y motungha gyud, dili magdugay. Anaa na sa kinasuloran niya kanang gamay'ng binhi. Karon kung inyong kuhaon. . . Klaro man kana nga ginapahayag sa mga Kasulatan.

42 Bueno kung aduna ka'y Kinabuhing Walay Katapusan karong gabhiona, kung aduna kita'y Kinabuhing Walay Katapusan, nan kita'y ingon na niana sa una pa, tungod aduna ma'y usa lamang ka porma sa Kinabuhing Walay Katapusan. Aduna na kita sa una pa. Ug ang hinungdan nga aduna na kita niana, tungod kay kabahin man kita sa Dios. Ug ang Dios mao lamang ang bugtong Eternal.

43 Ug sama ni Melquisedec kaniadto nga nagadawat og ikapulo gikan kang Abraham, ug gigahin na kadto sa iyang apo-sa-tuhod, nga si Levi, nga atua na sa mga bat-ang ni Abraham; nagbayad siya og ikapulo, tungod atua na man siya sa mga bat-ang ni Abraham sa dihang natagbo niini si Melchisedec. Gusto ko nga maghisgot mahitungod niana sa laing bahin, usa ka buntag. *Kinsa Kining Si Melquisedec?* Karon matikdi n'yo kini. Kaniadto, ang Dios nasayod na man nga motungha kini nga batang lalaki. Nasayod man Siya sa tanang mga butang.

44 Bueno kabahin na kita sa Dios. Kabahin na kamo sa una pa. Dili ninyo mahinumduman kini, tungod kay kamo kaniadto kinaiyahan pa lamang sa Dios. Anaa pa lamang kamo sa Iyang panghunahuna. Ang inyo mismong ngalan, kung anaa man kana sa Basahon sa Kinabuhi, gipahimutang na gyud kana dinha sa wala pa ang pagkatukod sa kalibutan. Hingsayran na Niya kung unsa kamo.

45 Ginasulti ko lang kini, dili para libogon kamo sa doktrina, kondili aron ihusto kini, aron nga makalingkawas kita gikan niini nga kahadlok ug pagkahadlok. Wala pa kamo masayod kaniadto kung kinsa kamo. Wala pa kamo masayod kaniadto, apan karon mga anak na kamo sa Dios. Kita n'yo, kamo'y mga anak sa Dios sa una pa. Kita n'yo?

46 Tungod kay sa dihang anaa ka pa sa Iyang panghunahuna sa Dios sa sinugdan kaniadto, gikinahanglan man, ang usa ka bahin kanimo, ang Kinabuhi nga anaa kanimo karon, kinahanglan nga mamaanaa na sa Dios kaniadto pa. Bueno, Siya, bisan kaniadtong wala pa Siya nagpakatawo dinhi ibabaw sa yuta, sa wala pa nagkaaduna og unsa man, gawas sa Dios, usa ka na sa Iyang mga kinaiyahan kaniadto. Nasayod na Siya kung unsay imong ngalan. Nasayod na Siya sa kolor sa imong buhok. Nasayod na Siya sa tanan-tanan mahitungod kanimo. Ang butang lang nga nahitabo sa dihang, nahimo ka nga usa ka makasasala . . .

47 Daghan kaninyo ang mahimong—mahimong magpakig-fellowship uban kanako mahitungod niini nga ideya. Kaniadtong usa ka pa ka batang lalaki, o kaha usa ka batang babaye, mahimong naglakaw-lakaw ka ug dunay mga butang nga, balewala ra sa ubang mga bata, pero aduna gyu'y butang sa kinasuloran mo nga nagatuaw. Aduna gayu'y Dios sa kon asa man, apan usa ka pa ka makasasala. Mahinumduman n'yo

pa ba kana? [Nagaingon ang kongregasyon, “Amen.”—Ed.] Mao gayud. Bueno unsa man kana? Mao kana ang gamay’ng porma sa Kinabuhi nga anaa na kanimo kaniadto pa.

⁴⁸ Ug dayon wala magdugay, napatalinghugan mo ang Maayong Balita. Tingali’g misimba ka na, gipili mo ang *ingon-ini* ug *ingon-ana*, ug nagbalhin-balhin ka og denominasyon. Apan usa ka adlaw, ingon nga kabahin ka na daan sa Dios, siguradong kabahin ka usab sa Pulong. Ug sa dihang napatalinghugan mo ang Pulong, nasayod ka na kon diin ka naggikan, nasayod ka na kung unsa gayu’y Kamatuoran. Tungod kaniadto pa, ang binhi anaa na man sa kinasuloran mo. Nakita sa Pulong ang Pulong nga anaa na diha kanimo, sa wala pa ang pagkatukod sa kalibutan, nakita mo ang Pulong ug miduol ka Niini.

⁴⁹ Sama ra sa akong sugilanon mahitungod sa gamay’ng agila, kung unsa nga napiso ang gamay’ng agila ilalum sa usa ka himongaan. Ug nag-uban-uban sa mga manok ang maong batang agila, siya, pagmokurukutok ang himongaan, ug dili gyud niya masabtan ang kurukutok sa himongaan. Ug—ug sa gagmay’ng mga piso, nga ang ilang pagkaon anaa diha sa nataran, siya—dili pud niya masabtan kana, kung nganong nagakaon sila niana. Apan aduna gyu’y butang sa kinasuloran niya, nga pagkalahi kay sa manok, tungod kay sa sinugdanan usa man siya ka agila. Husto kana. Usa niana ka adlaw gipangita siya sa iyang mama, ug, sa pagkadungog niya niadtong singgit sa agila, pagkalahi gyud niadtong kay sa kurukutok sa himongaan.

⁵⁰ Ug ingon niana usab sa matag magtotoo nga natawo-napag-usab. Mahimong madungog n’yo ang tanang teolohiya nga gusto ninyo, ug ang tanang kasukwahian nga hinimo-sa-tawo; apan pagmokidlap na gani kanang Pulong dinha, nan aduna gyu’y butang nga mokontrolar, mao nga moduol ka ngadto Niini. “Kamo nga mga patay pa tungod sa sala (niini nga kinabuhi) gibuhi na Niya.” Kinahanglan aduna gyud una og Kinabuhi nga pagabuhion, dinha. Ang Dios, pinaagi sa Iyang pagkahibalonang-daan, nasayod na sa tanang mga butang. Ug kita usab gitagana-nang-daan nga mamahimong mga anak nga lalaki ug mga anak nga babaye sa Dios. “Kamo nga mga patay pa tungod sa sala ug mga kalapasan, nga kanhi mao ang panaggawi natong tanan, apan karon gibuhi na Niya.”

⁵¹ Matikdi n’yo si Pablo, kaniadtong usa pa ka bantugang teologo si Pablo. Apan sa dihang naatubang niya sa nawong og nawong ang Pulong, si Jesus, nabuhi siya. Nahimo siyang Buhi sa gilayon, tungod kay gikatagana man siya nga mamaingon niadtong. Ang . . . Kabahin man siya sa Pulong; ug sa dihang nakita sa Pulong ang Pulong, ingon niana ang iyang kinaiyahan. Ang tanang pagkurukutok sa mga himongaan, sulod sa mga iglesiang orthodox, walay epekto kaniya; nakita niya ang Pulong. Kabahin na Kadto kaniya. Usa siya ka agila. Dili siya usa ka manok; atua

lang siya sa maong nataran uban kanila. Apan siya'y usa gyud ka agila, sa sugod pa lang.

⁵² May nadungog sab ko og parehong diyutay nga sugilanon, dili unta kini medyo panamastamas, mahitungod kadto sa usa ka gamay'ng pato nga napiso ilalum sa usa ka himongaan, usa ka higayon. Wala siya makasabot. Ang usa ka kataw-anan og hitsura nga gamay'ng pato, lahi gyud siya, ug wala gyud niya masabti ang abog ug ingon-anang mga butang. Didto ra sila nagadula-dula sa nataran. Apan usa niana ka adlaw gipangunahan sa himongaan ang gamay'ng mga piso niini didto luyo sa kamalig, ug nakasimhot og tubig ang maong pato. Busa, mipaingon siya niadtong tubig sa ingon ka paspas nga mahimo niya. Ngano man? Wala siya sukad-sukad nakaadto sa lim-aw. Wala pa siya sukad-sukad nakaadto sa tubig. Apan usa man siya ka pato, sa sugod pa lang. Mao nga ang mismong butang nga siguradong buhaton niya mao ang manglihok kung unsa gyud siya.

⁵³ Mao ra usab gihapon sa magtotoo. Aduna gyu'y butang sa kinasuloran niya, nga, pag matagbo niya ang Dios sa nawong og nawong, maamgo niya kung unsa gyud siya mismo. Anaa na kaniya ang binhi, ug mao nga nabuhi kana. Aba, husto kana, ug igasalikway niya ang mga butang nga iya sa kalibutan. Tungod ang mga niini patay na man para kaniya. Aba, akong mahinumduman, nga nanagkinabuhi pud kitang tanan, kaniadto, nianang mga butang nga iya sa kalibutan. Apan sa higayon nga magunitan na nato kanang tinuod nga Butang, butang nga nabuhi kanato, usa ka gamay'ng binhi nga nahimong Buhi, nan ang tanang mga butang nga iya sa kalibutan mangadugta gayud. Wala na kita'y tinguha pa niana.

⁵⁴ “Siya nga gipanganak gikan sa Dios, dili magahimo og sala. Ang magsisimba sa tapus na mahinloi sa makausa wala na'y pag-ila sa sala, wala na'y tinguha sa pagpakasala.” Tapos na ang problema sa sala. Nahimo ka na nga kabahin sa Dios, diha kang Cristo. Namatay man si Cristo aron luwason kamo.

⁵⁵ Karon palandunga ninyo kung asa na kaha kitang tanan karon kung dili pa lang tungod sa Dios. Apan ang Dios, tungod sa kadagaya sa Iyang kalooy, gitubos Niya kita karong gabhiona! Asa kaha kita karong gabhiona kung dili pa tungod sa madagayaon nga kalooy sa Dios para kanato?

⁵⁶ Ngani ang kalibutan kaniadto nahimong makasasala kaayo, tungod ang tawo nagpakaylap man og kadautan sa ibabaw sa yuta hangtud miabot sa punto nga nasubo ang Dios nga gimugna Niya ang tawo. Mora og nadunot nga samad ang tibuok ulo, ang tibuok lawas, ug nasubo gayud ang Dios nga gimugna pa Niya ang tawo. Busa miingon Siya, “Pagalaglagon Ko ang tawo nga akong gibuhat.” Pagalaglagon Niya sila tungod kay ang tawo wala gyu'y lain kondili usa na lamang ka pundok sa kadautan.

57 Ug ang tibuok kaliwatan sa tawo napuo na unta niadtong panahona, apan ang Dios, nga madagayaon sa kalooy, wala man mitugot nga mangalaglag ang mga inosente uban sa mga sad-an. Ug mao nga miadto Siya ug nagtagana og paagi alang niadtong nagtinguha nga makasulod, og nagtinguha nga buhaton kung unsay husto. Siya, nagbuhat gyud og paagi aron makaloy-an kadtong mga nangayo og kalooy, ug nag-andam Siya og usa ka arka. Sa laing pagkasulti, nagbutang Siya og mga pako sa Iyang mga agila, aron nga makalupad sila ibabaw sa paghukom, ug dili mangalumos uban sa mga manok. Ug Siya—nagbuhat Siya og paagi sa paglingkawas, sa mga adlaw ni Noe kaniadto. Kini mao’y nagpahinungdan Kaniya nga buhaton kadto, og aron itagana kadto, tungod kay Siya madagayaon man sa kalooy.

58 Apan human nga mihatag Siya og paagi alang sa mga tawo ug dayon gibalibaran nila kini, bueno, ang hinungdan nga gibalibaran nila kini tungod kay wala man gud og unsa man dinha sa sulod nila nga mahimong modawat niini. Wala gyu’y unsa man dinha sa sulod nila nga modawat niini. Ginasulti sa akong inahan kaniadto, “Dili ka makakuha og dugo gikan sa singkamas, tungod kay wala ma’y dugo sa singkamas.” Busa kung wala usab og porma sa Kinabuhi dinha aron modawat Niini, nan dili Kini madawat.

59 Mao kana’y hinungdan nga ang mga Fariseo kaniadto mitutok ra sa atubangan mismo ni Jesus, ug gibansagan Siya nga, “Beelzebub,” tungod kay wala ma’y bisan unsa sa sulod nila aron dawaton Siya. “Apan ang tanan nga gikahatag Kanako sa Amahan,” miingon Siya, “magaari Kanako.” Aduna—aduna gyu’y paagi nga maipresentar kini.

60 Mahimong makig-estorya kamo sa mga tawo usahay diha sa kadalanan, makig-estorya kanila mahitungod sa Ginoo, og kataw-an ka lang nila sa imo mismong atubangan. Bueno, buhaton lang gihapon nato kana, bisan pa man. Apan paminaw, “Walay tawong makahimo sa pag-ari Kanako gawas kon pagadanihon siya una sa Akong Amahan.” Ang Dios man mao’y magadani. Kinahanglan nga aduna mismo’y Kinabuhi. “Ug ang tanan nga gikahatag Niya Kanako, magaari Kanako.”

61 Naghatag Siya og pamaagi alang niadtong nagatinguha nga mamaluwas. Naghatag Siya og pamaagi alang niadtong nagatinguha nga mamaayo. Ug tungod gibuhay Niya kini, nagpahimo kini Kaniya ingon nga madagayaon sa kalooy, tungod kay Siya sa una pa madagayaon man sa kalooy. Mao nga sigurado gayud, kung isalikway n’yo Kini, wala na gayu’y nahibilin pa kondili ang Paghukom, tungod kay ang sala kinahanglan man pagahukman.

62 Si Faraon, kaniadtong miagi na siya sa—sa dagat, ingon nga usa ka manunundog, nakita man niya nga mahimo pud diay niya nga moagi nga sama ni Moises. Si Moises uban ang iyang

kasundalohan, ug si Faraon uban ang iyang kasundalohan, daw sa, pareho gyud silang mangamatay na didto sa dagat. Apan ang Dios, nga madagayaon sa kalooy, nagbuhat gyud og paagi aron makaikyas ang Hebreohanong mga anak, (ngano man?) tungod kay mituman man sila sa linya sa pangatungdanan, og mituman sila sa Pulong.

⁶³ Bueno mao lang kana ang bugtong paagi nga makaangkon 'ta og kalooy, ang pagtuman sa mga sugo nga gikahatag sa Dios kanato aron pagatumanon. Mao lang kana ang bugtong paagi nga magpakita Siya og kalooy, sa diha nga ginatuman nato ang Iyang gisulti nga pagabuhaton.

⁶⁴ Sama ra sa hamubong debate nga aduna ako dili pa lang dugay, sa usa ka ministro nga miingon nga nagatudlo kono ako og apostolikanhong Doktrina sa niini nga panahon. Nagtoo ko naghigot na ko mahitungod niini usa o duha ka gabii na ang milabay, o sa laing higayon, kung unsa nga miingon siya, "Ginapaninguhaan pa man nimong itudlo, sa niini nga kapanahonan, ang apostolikanhong Doktrina." Ingon siya, "Tapos na man ang apostolikanhong kapanahonan, kaniadto pa sa mga apostoles."

Ug gipangutana ko siya, "Bueno, nagatoo ka ba sa Pulong?"

Ingon siya, "Oo."

⁶⁵ Miingon ko, "nagaingon baya ang Pinadayag 22:18, nga, 'Ang si kinsa man nga magataktak og usa ka Pulong gikan Niini, o magadugang og usa ka pulong ngadto Niini,' dili nga duha ka pulong; kondili usa lamang ka Pulong, usa ra ka Pulong nga pagataktakon."

Ingon pa, "Nagatoo man ko niana."

⁶⁶ Ingon pud ko, "Kung ingon-ana isulti ko kanimo kon kanus-a gisugdan ang apostolikanhong kapanahonan, ang apostolikanhong mga Panalangin nga gikahatag ngadto sa Iglesia; karon isulti pud kanako pinaagi sa Pulong, kon kanus-a kini gibakwi sa Dios gikan sa Iglesia. Dili mo mahimo; tungod wala man kini dinha." Ingon ko, "Karon hinumdumi, nga si Pedro, sa Adlaw sa Pentecostes kaniadto, siya man mao ang—ang nagpaila sa apostolikanhong kapanahonan. Ug gisultihan niya sila kaniadto nga, 'Maghinulsol kamo, ug magpabautismo sa Ngalan ni Jesus Cristo alang sa kapasayloan sa inyong mga sala, ug madawat ninyo ang gasa nga Espiritu Santo. Kay ang saad alang kaninyo, ug sa inyong mga anak, ug sa tanang atua sa halayo, bisan ang kapid-an nga pagatawgon sa atong Ginoong Dios.'"

⁶⁷ Karon kung gusto ra gihapon ninyong magpatalinghug sa kurukutok sa usa ka denominasyong himongaan, ug magkinabuhi dinha sa mga butang nga iya sa kalibutan, nan nagapakita ra kana nga aduna gyu'y sayup. Tungod kay, mao man Kini ang Pulong. "Ang may tinguha, paanhia siya." Ug kung

aduna ka ma'y tinguha, siguradong moari gyud ka. Apan kung wala ka'y tinguha, nan anaa ka sa makalooloy nga kahimtang. Pero kung aduna ka'y tinguha nga moari, nan moari gyud ka nga ginatuman ang pormula sa Dios!

⁶⁸ Ug wala gayud Siya nagakapakyas nga tumanon ang Iyang gisaad. Sa batan-on pa ako kaniadto, ug karon nga tigulang na ko, wala ko gayud nakita nga napakyas Siya diha sa Iyang Pulong. Tungod kay, mahimo Niya ang unsa mang butang gawas sa mapakyas. Dili Siya mahimong mapakyas. Dili mahimong mapakyas ang Dios. Imposible gyud para sa Dios nga mapakyas, ug magpabilin nga Dios ra sa gihapon. Kinahanglan Niya, nga tumanon kana.

⁶⁹ Bueno ang kasundalohan ni Faraon kaniadto naningkamot gyud nga magsundog-sundog, tungod kay dili man sila tinawag ug wala pud sila nakabaton og Kinabuhi. Ngadto sa... Ang maong saad wala man gikahatag ngadto kang Faraon. Wala siya gisaraan para sa yutang saad.

⁷⁰ Ug ang usa ka manunundog, nga gapaninguhang sundogon ang usa ka tinuod nga magtotoo nga tinawag para sa ingon-anang butang, ang pagsundog-sundog niya nahimo hinoon og pagbiaybiay. Mao kana'y nagakahitabo sa atong sistemang pang-relihiyon karong panahona, daghan kaayong mga tawo ang gapaningkamot nga sundogon ang Balaang Espiritu, daghan kaayong mga tawo ang gapaningkamot nga sundogon ang bautismo, og daghan kaayong mga tawo ang gapaningkamot nga sundogon ang apostolikanhong kapanahonan. Para lang man kini sa mga magtotoo, ug para lang gyud kanila. Nagbuhat og paagi ang Dios, nga madagayaon sa kalooy, aron ang Iyang mga anak dili mangalaglag. Nagbuhat gayud Siya og paagi para kanila.

⁷¹ Karon, sa pagpaningkamot kaniadto ni Faraon nga mogukod, nalumos hinoon siya sa mismong katubigan nga mao'y nagluwas kang Moises ug sa grupo niini. Bueno, wala gayud nangalumos sila ni Moises, tungod kay ang Dios madagayaon man sa kalooy para kanila nga nanagsunod sa Iyang gikatagana nga paagi. Amen.

⁷² Nasabtan n'yo ba ang buut kong ipasabot? Nga, karong gabhiona, ang mga tawo nga wala nagatoo sa Balaanong pagpang-ayo, og ang mga tawo nga wala nagatoo sa bautismo sa Espiritu Santo, unsaon man nila sa pagpakadawat sa bisan unsang butang? Ang Dios madagayaon gyud sa kalooy alang niadtong magasunod Kaniya; dili sa pagsunod sa usa ka kredo, kondili sa pagsunod sa Dios.

⁷³ Ang Dios mao ang Pulong, ug nahimo Kining unod ug nagpuyo ipon kanato, karon, aron nga Iyang maipasundayag ang ubang mga kinaiyahan sa Dios. Ang lawas, si Jesus, mao man ang lawas sa Dios, ang kinaiyahan. Nakita Siya kaniadto ni Moises

nga milabay, ang likod ra Niya nga bahin; tungod wala ma'y si bisan kinsa ang nakakita sa Iyang dagway. Apan karon nakita nato Siya, nakita nato Siya, nakita Siya ingon nga mao ang Halad. Karon, kita n'yo na, Siya mao ang kinaiyahan sa Dios, nga gipasundayag, ang Pulong. Ingon niana Siya.

⁷⁴ Ug sa diha nga moduol ang si kinsa man nga nagatoo sa Dios, mamahimo siyang kinaiyahan sa Iyang Pulong sa Dios, tungod pagagamiton man siya aron ipahayag ang Pulong nga gikasaad alang niana nga panahon. Kita n'yo? Husto kana. Ang Dios, nga madagayaon sa kalooy, wala gayud mibiya kanato nga walay ni usa ka pagpamatuod. Siya'y madagayaon sa kalooy.

⁷⁵ Hingsayran nato nga ang Dios maloloy-on kaayo kang Moises kaniadto didto sa dead sea, didto sa Dagat nga Mapula, diay. Dayon sa dihang gisulti sa Dios dinhi, sa Exodo 19:4, miingon Siya, “Gidala Ko kamo pinaagi sa mga pako sa mga agila, gidala kamo nganhi Kanako. Gidala sila pinaagi sa mga pako sa mga agila, ug gidala kamo nganhi Kanako!” Aduna ma'y ubang mga kalalaken-an nga atua sa tunga niadtong dagat didto, usab, nga naninguhang magsundog-sundog. Apan unsa man? “Iyang gidala sila pinaagi sa mga pako sa mga agila.”

⁷⁶ Bueno kanunay'ng gipahisama sa Dios ang Iyang mga propeta ngadto sa mga agila. Ug unsa man kadto? Si Moises mao ang Iyang mensahero. Ug misunod sila kang Moises, ug kadto mao ang mga pako sa mga agila nga nagdala kanila, tungod kay si Moises man ang nagdala sa mensahe sa Dios. Ug misunod niadto ang mga tawo. Misunod sila sa Dios sa diha nga misunod sila kang Moises nga dala ang Iyang mensahe sa kaluwasan. Ug miingon ang Biblia nga, “Siya, wala sila nangalaglag uban sa kadtong mga wala nanagtoo.” Kay, ang Dios madagayaon man sa kalooy ngadto kanila, tungod kay mituman man sila sa Iyang mga sugo. Ang gusto sa Dios nga tumanon nato ang Iyang mga sugo.

⁷⁷ Mahimo pud natong isulti ang mao rang butang mahitungod kang Korah ug kang Dathan ug sa ilang grupo nga mga tawong wala-nagatoo, kaniadtong naninguha pud silang magsundog-sundog. Gitinguha nila nga magsal-ot og usa ka butang ngadto sa programa sa Dios. Ayaw man nila sa pang-usa ra ka tawo nga programa. Ayaw nila og ingon niana. Kinahanglan nga aduna sab sila'y pagabuhaton. Miingon si Korah, “Aba, duna ma'y daghan pang balaan nga mga tawo kay kanimo, Moises. Nagalihok ka man nga mora'g ikaw ra ang bugtong baybayon sa...o ang bugtong bato sa baybayon, diay.” Ug miingon, “Ako—ako...dili mo angay'ng buhaton kana. Tungod aduna pa ma'y mga tawo dinhi.”

⁷⁸ Ug nasayod si Moises nga siya mao ang magadala sa maong mga kaanakan didto sa yutang saad, tungod kay siya man ang

gihatagan og saad. Ug kinahanglan niyang dalhon sila ngadto sa yutang saad.

⁷⁹ Ug, sa karong panahon, ania ang Balaang Espiritu aron panghimatud-an ang Pulong sa Dios, ug mao kana ang pako sa agila nga atong pagasakyan; dili sa kung unsang teolohiya nga hinimo-sa-tawo. Kondili magasakay kita pinaagi sa mga pako sa agila, paingon sa Yutang saad.

⁸⁰ Ug nag-aghat sila kaniadto og usa ka pundok sa mga manok didto, mao'y gihunahuna ni Korah, kabalo na mo, aron paadtoon didto, og sundogon kining, agila. Ug sa pagsundog-sundog nila, miingon ang Dios, “Ipahilayo ang imong kaugalingon gikan kanila,” ug gipalamoy Niya sila sa yuta. Mahimo man Niya untang ipalamoy sa yuta ang maong tibuok butang, ang tibuok kabuhatan, apan ang Dios madagayaon man sa kalooy alang niadtong naninguha nga motuman sa Iyang Pulong. Sa kanunay, ang Dios madagayaon gyud sa kalooy. Daghan sab kanila kaniadto ang midapig kang Moises, ug gipabuka sa Dios ang yuta ug gipalamoy ang mga dili-magtotoo. Siya, ang—ang dili-magtotoo, kanunay gyud nga malaglag.

⁸¹ Ang mga wala mitoo, bisan pa nga uban sila nga nanggawas kaniadto ug mipanaw sa hamubo nga panahon, apan, sila, ang ingon ni Jesus, “Sila, tanan sila, nangamatay.” Ang *pagkamatay* mao'y “pagkahanaw.” Nangamatay sila. Hunahunaa n'yo sila. Nanggawas sila, og nakasaksi sa mga milagro sa Dios, nakita ang gamhanang kamot sa Dios, nanagpakaambit usab og manna; ug nanggawas man sila didto pero nagpatalinghug ra diay sa usa ka tawo nga ginganlan og Balaam, nga mao'y nagtuis sa pamaagi sa Dios, pinaagi sa iyang pagtulon-an nga sukwahi sa Pulong, “Managsoon ra man kitang tanan, busa maghiusa na lang kitang tanan.”

⁸² Ingon niana ang usa na usab ka sistema nga iya ni Balaam ang nagatungha, sa karong panahon, “Maghiusa kitang tanan.” Dili gayud kana magpulos. Managlakaw hinoon kita kauban ang Agila, kang Jehova'ng Agila. Mga gagmay'ng agila man kamo.

⁸³ Adunay tulo lamang nga nahilwas sa tibuok panon kaniadto; si Moises, si Caleb, ug si Josue. Ang tanang uban pa kanila nangamatay didto sa kamingawan; mao kana ang giingon ni Jesus, diha sa San Juan sa ika-6 nga kapitulo. Ang Dios, diha sa kalooy, wala mitugot nga mangamatay sila, uban, sa tanang uban pa nga mga dili-magtotoo. Nangamatay silang tanan mismo didto sa kamingawan, ug nangamatay gyud sila. Pero giluwes sa Dios si Moises ug ang mga magtotoo'ng agila, tungod kay aduna man sila'y pagtahud sa Iyang Pulong.

⁸⁴ Ug karon, higala, kana lang ang bugtong paagi nga makabaton kita og kahimuut sa Dios; ang Dios madagayaon man sa kalooy, karong panahona, apan kinahanglan gyud natong tahuron kung unsay Iyang gisulti mahitungod niini.

Dili n'yo puedeng toohan kung unsay gisulti ni kinsa pa man. Kinahanglan ninyong toohan ang kung unsay gisulti sa Dios. Siya miingon, "Ang matag pulong sa tawo bakak, ang sa Ako mao'y tinuod."

⁸⁵ Sa karong panahon ginasultihan kita nga, "Ang kinahanglan mo lang buhaton," sa daghang mga dapit, "ang magpamiyembro lang sa iglesia, magkaaduna og kredo, o butang nga ingon niana; o mangadye, o ipalista ang ngalan sa libro, o ang mawisik-wisikan o mabautismohan sa usa ka pamaagi, o ingon niana. Kana lang ang kinahanglan mong buhaton." Apan sayup kana.

⁸⁶ Aron mamahimong agila sa Dios, kinahanglan mong tumanon ang Pulong, sa matag adlaw. Kinahanglan padayon ka nga, magakaon sa Pulong.

⁸⁷ Bueno hingsayran nato nga, human niadtong higayona, sila nanagbagulbol na usab, nangapukan ang pagtoo, human nga ang Dios nagpakita na og kalooy ngadto kanila. Ug hingsayran nato nga nanagbagulbol gihapon sila sa Dios, ug, sa pagbagulbol nila, naghimalatyon sila tungod kay gipamaak sila sa bitin. Hinoon, angay ra man kadto kanila. Mao gayud sila. Ang si kinsa man nga himoong sayup ang pagpasabot sa Pulong sa Dios ug mobuhat sa ingon-ining mga butang nga gibuhat nila kaniadto, angayan ra silang mamatay. Ang matag usa kanila nga nagtinguha sa pagbuhat sa ingon, angayan ra nga mamatay didto sa kamingawan.

⁸⁸ Apan sa dihang nagmasakiton na kaayo ang mga tawo nga bisan sila ni doktor Moises wala na'y unsa man nga mahimo niadto, ug linibo-libo na ang naghimalatyon kanila; apan ang Dios, nga madagayaon sa kalooy, nagbuhat Siya og paagi sa paglingkawas alang sa mga mitoo Kaniya. Naghimo Siya og pangtambal para niadto, pinaagi sa pagpahimutang og usa ka tumbaga nga serpente. Ang Dios sa Iyang pagka-madagayaon... nagbuhat ang Dios og paagi sa paglingkawas aron nga mamaayo ang Iyang nagatoo nga mga anak.

⁸⁹ Ngani ang Dios may kahingawa bisan sa unsa mang butang nga sayup, og sa tanang butang nga imong ginapangandoy. Sa tanang matang sa kinabuhi, ang Dios may kahingawa mismo kanimo. Anak ikaw Niya, ug mao nga madagayaon Siya sa kalooy. Buut sab Niya nga mamuhat para kanimo.

⁹⁰ Pagkahuman niadto ang mga tawo nanagpakasala gihapon, sa pagdawat nila sa mao mismong butang nga gihimo sa Dios ingon nga usa ka pangbayad-sa-sala unta alang kanila, pinaagi sa tumbaga nga serpente, nga nagrepresentar nga ang sala nahukman na, ug gihimo man nila og dios-dios kadto nga gasa. Ug tungod niadto nanagpakasala sila pag-usab. "Dili man ipaambit sa Dios ang Iyang himaya sa kang kinsa man." Busa, dili kita puedeng magbaton og duha, tulo, o upat ka mga dios-dios. Tungod aduna lamang og usa ka Dios. Dili gyud Niya

ipaambit ang Iyang himaya sa uban. Siya ra gyud ang Dios, wala na'y uban, kita n'yo; dili sama sa mga pagano nga daghan og mga dios-dios. Aduna kita'y usa ra ka Dios, ug dili Niya ipaambit ang Iyang himaya ngadto sa usa pa, ni pagatugotan Niya ang unsa mang butang nga mahimong usa ka dios-dios sa Iyang atubangan. Bisan pa naghimo na Siya og usa ka pangbayad-sa-sala alang sa mga tawo, ug mao kadto ang Pulong sa Dios, nga mao'y husto; apan sa dihang gihimo na nila kadto nga dios-dios, didto na sila nagkaproblema.

⁹¹ Bueno mao gihapon, sa hunahuna ko, ang nangahitabo sa atong mga kapanahonan sa iglesia. Gipadalhan kita sa Dios og mensahe ni Martin Luther nga dala ang iyang mensahe, si John Wesley, ang pentecostal nga mensahe, apan unsa ba'y gibuhath nato niini? Mao ra gihapon sa mismong butang nga gibuhath nila kaniadto sa tumbaga nga serpente, gihimo nato kining dios-dios, "Miyembro ako sa *ingon-niini*, ug miyembro ako sa *ingon-niana*." Nakita n'yo na, nagpasakop kamo sa usa ka butang nga walay pagkasinsero sa pagpakighilambigit sa tinuod nga diosnong pagsimba sa Pulong.

⁹² Unsa ma'y nahitabo? Ang Biblia, gisultihan na kita diha sa Biblia, nga, "Gikuha sa propeta kadtong diosdios ug giguba kadto." Alleluyah!

⁹³ Ang gikinahanglan nato sa esena karong panahona usa ka propeta nga moguba sa dios-dios sa mga denominasyon, nga abi nila makaadto sila sa Langit tungod nga nahisakop sila sa usa ka kredo o usa ka denominasyon; kinahanglan kini nga pagagun-obon ug pagasunogon, og igasalikway. Ang Dios puno sa kalooy. Siya'y madagayaon sa kalooy. Niadtong adlaw nga kitang tanan atua pa sa tumang kangitngit kaniadto, apan ang Dios, nga madagayaon sa kalooy, gipadalhan kita sa tinuod og matuod nga Espiritu Santo, nga dala ang Kaugalingon Niyang interpretasyon Niini, dinhi mismo sa bilding matag gabii. Ang Dios, nga madagayaon sa Iyang kalooy, pagkaanindot gayud nga nakaplagan nato Siya nga ingon niana! Oo, sir.

⁹⁴ Bueno ang gihunahuna lang nila kaniadto nga moadto lamang niadtong bitin, o niadtong gamay'ng butang nga gipahimo sa Dios didto, gipahimo kang Moises ug gipabitay ibabaw sa usa ka bandila, ug mamaayo na sila nga walay unsa mang pagkasinsero. Basta motindog lang sila ug motan-aw niadto. Ug hinay-hinay man nilang gihimo nga dios-dios kadto, ug mao nga nagpadala ang Dios og propeta ug giguba kadto.

⁹⁵ Bueno, ang tanan nga nagdumili sa pagtan-aw niadtong serpente didto sa kamingawan, sila nangamatay. Karon nagahimo ang Dios og pamaagi, apan kung magdumili ka sa pagtan-aw niini, kung magpabilin ka lang dinha sa dalan, kung manghawid ka lang sa kung unsa nga kredo ug mobalibad nga diretsong motan-aw sa Pulong ug hibaloong kung Kini'y husto

ba o dili; ang tanan nga nagdumili sa pagtan-aw kaniadto, nangamatay sila. Ug ang Dios wala gayu'y pagkausab nga Dios. Ug ang tanang nagdumili sa pagtan-aw, nangamatay gayud sila. Mao man usab karong panahona, mao ra gihapon.

⁹⁶ Dayon human niadto nanagpakasala ang mga tawo, ug maingon sa ginabuhat nila kanunay, ug gihimo nila nga—nga dios-dios kadto, gihimo kadto ingon nga usa—usa—usa ka . . . nanagdawat, naninguha nga makadawat og kaayohan nga walay pagkasinsero, ug sila “nagpamiyembro sa usa ka butang,” ug sama ra sa atong ginabuhat sa karong panahon. Ug karon makita nato dinha, ang kalahian niana, kaniadto, nga ang Dios . . .

⁹⁷ Maayo man kadto nga pangbayad-sa-sala ug maayo sab nga ilhanan alang niadto nga panahon. Angay ra kadto, niadtong panahona. Ug para lang gyud kadto niadtong panahona, para niadto nga pagpanaw. Magpulos lamang kadto para, *niadto* nga pagpanaw.

⁹⁸ Ug ang mensahe nga gidala ni Martin Luther, mahitungod sa pagpamatarung, angay ra usab para sa kapanahonan ni Luther. Kutob lang kini didto.

⁹⁹ Maayo man ang pagpabalaan sa kapanahonan ni Wesley. Kutob lang pud kini didto.

¹⁰⁰ Dayon misulod kita sa pentecostal nga kapanahonan. Ug ang pagpasig-uli sa mga gasa maayo man kaayo nga butang, maayo kini sa maong kapanahonan, apan milagpas na kita nianang kapanahonan sa karon. Milagpas na kita niana, sa ingon ka sigurado nga dunay kalibutan. Kinahanglan lagpasan usab nato kana nga butang, tungod kay gibuhat man nato ang mao gihapong butang nga gibuhat nila kaniadto, naghimo og dios-dios gikan niana. “Miyembro ako sa ingon *niini* nga grupo, miyembro ako sa ingon *niana* nga grupo.”

¹⁰¹ Aduna gyu'y ipadala ang Dios nga mao'y moguba sa maong butang ug watas-watson kana, ug panghimatud-an ang Iyang Pulong, ang bug-os nga Pulong. Matikdi. Dalaygon ang Dios! Karon hingsayran nato nga tinuod kana. Ang Dios, madagayaon gyud sa Iyang kalooy!

¹⁰² Dayon sa dihang giguba na kadto sa propeta, wala na'y nahibilin kanila og unsa man nga ilhanan alang sa ilang kaayohan, nga pangbayad-sa-sala, tungod kay giguba na man ang ilang dios-dios. Apan ang Dios, nga madagayaon sa kalooy, naghatag na usab og lahi para kanila. Ug unsa ma'y Iyang gibuhat, kaniadto? Iyang gipalihok ang tubig didto sa ligoanan sa templo, ug daghan ang miduol ug nangaayo, pinaagi sa pagubog niadto nga tubig. Miadto si Jesus niadtong mao mismong ligoanan, ug nakita ang usa ka tawo nga naghigda didto sulod sa pipila na ka mga tuig, nga nagahulat sa paglihok sa tubig. Kita n'yo ang Dios, nga madagayaon sa kalooy! Bisan og gihimo nilang dios-dios kadto nga butang, bisan og gikinahanglan nga

watas-watson kadto sa propeta, ang Dios nagbuhat gihapon og lahi nga pamaagi para kanila, tungod Siya'y madagayaon man sa kalooy. Buut Niya nga mamaayo sila, ug mao nga nagbuhat Siya og paagi alang sa ilang kaayohan.

¹⁰³ Karon, dayon nagpadayon kadto, og ang kalibutan nahimong mas makasasala ug labi pang makasasala, sa matag higayon. Ug sa katapusan ang kalibutan nahimong makasasala kaayo hangtud nga laglagon na unta kini sa Dios, miingon Siya sa Malaquias 4, “tingali unya Ako moanhi ug samaran Ko ang yuta pinaagi sa usa ka panghimaraut.” Mahimo man Niya unta nga buhaton kadto; tungod sa maong problema.

¹⁰⁴ Apan ang Dios, nga madagayaon sa kalooy, nagpadala Siya og usa ka Manluluwas, si Jesus Cristo. Gipadala Niya si Jesus aron parehong mamahimo nga Manluluwas ug mananambal. Kay miingon Siya, “Maingon nga si Moises nagpatindog og tumbaga nga serpente sa kamingawan, mao usab ang Anak sa tawo nga kinahanglan pagapatindogon,” alang sa mao gihapon nga katuyoan. Siya, ingon nga pangbayad-sa-sala, mao kana'y atong maangkon, wala na'y lain kondili ang pangbayad-sa-sala. Ang gipalit ni Jesus pinaagi sa Iyang Dugo, mao kana'y atong maangkon. Ug miingon ang Biblia, “Siya gisamaran tungod sa atong mga kalapasan, Siya napangos tungod sa atong kasalanan, ang silot sa atong pakigdait diha sa ibabaw Niya; ug tungod sa Iyang mga labod kita nangaayo.” Mao kana'y mahimo natong maangkon, tungod kay mao man kana ang pangbayad-sa-sala, nga atong gibarugan, og gikasugo para kanato. Ang Dios, madagayaon gayud sa kalooy!

¹⁰⁵ Kini mao ang Eternal nga pangbayad-sa-sala, tungod kay Siya Mismo ang mianhi. Ang Dios Mismo ang mianhi, diha sa porma sa makasasala nga unod, aron himoon ang usa—usa—usa—usa ka Eternal nga pangbayad-sa-sala; ug nag-antus diha sa unod, ug gihimo ang pagbayad-sa-sala; ug mibalik sa porma nga Espiritu Santo, aron panghimatud-an kana nga pangbayad-sa-sala. Diin walay tumbaga nga serpente o walay paglihok sa tubig ang makahimo niana, kondili ang tanan napahinungod gyud nianang hingpit nga Pangbayad-sa-sala. Ang Dios, nga madagayaon sa Iyang kalooy, mao gayu'y naghimo niini.

¹⁰⁶ Bueno, karong panahona, ingon nga mao kini ang adlaw nga atong gikinabuhian, nga miagi na niining mga kapanahonan sa iglesia ug nagsaysay og mga butang nga halayo ra Niini. Ang atong mga teologo sa karon halayo na kaayo sila Niini. Ginasaysay nila Kini nga halayo ra, nga ginapahinungod Kini ngadto sa ubang adlaw, sa ubang kapanahonan, og ubang butang, nga miagi na, kaniadto pa. Ug natapos na kono ang Balaanong pagpang-ayo, og halos wala na'y si bisan kinsang makaplagan nga nagatoo niini. Gibiaybiayan nila kini. Pareho ra niadtong baynte ka tuig ang milabay, gibiyabiayan nila kini. Ang mga Pentecostal bug-os gayud nga napahilayo na

niini. Nanagtoo man sila kaniadtong unang mga panahon, apan napahilayo na sila niini karon.

¹⁰⁷ Matikdi kung unsay ilang gibuhat. Bueno nangasamot sila sa ilang pagka-denominasyon, naningkamot sila sa paghimo og tagsa-tagsa nilang kredo, ug uban pa. Imbis, unta nga dawaton ang Kahayag, sa diha nga miabot ang Kahayag; nag-organisa hinoon sila ug naghimo og kaugalingon nilang mga kredo, tagsa-tagsa silang, nanaghimo og kaugalingon nilang doktrina ug nagpabilin na niana nga doktrina. Ug dayon okupado na kaayo sila niana hangtud nga ang Balaang Espiritu dili na makasulod sa iglesia. Naghimo sila og ilahang dios-dios nga sama sa tumbaga nga serpente, og nahimo kana nga usa—usa ka pagsimba og dios-dios. Nagaingon ang matag tawo, “Miyembro man ko *niini*, ug miyembro man ko *niana*.” Usa kana ka pagsimba og dios-dios. Grabe nga kalamukat ang atong nadangatan, sa katapusang panahon.

¹⁰⁸ Apan ang Dios, nga madagayaon sa Iyang kalooy, gipadala Niya og balik ang Balaang Espiritu nganhi kanato, ug ginapanghimatud-an ang Iyang Pulong karong gabhiona sumala sa Iyang gikasaad nga Iyang pagabuhaton. Nagsaad man ang Dios nga pagabuhaton Niya kining mga butanga. Tan-awa n’yo kung unsay Iyang gibuhat!

¹⁰⁹ Tan-awa n’yo kung unsay gibuhat Niya, karon atong makita nga gisaaran gayud Niya ang matag kapanahonan og usa ka butang nga mahitabo. Ug makita sab nato nga nahitabo kini nga eksaktong sama gayud, sa Iyang gisulti nga Iyang pagabuhaton, tungod kay Siya madagayaon man sa Iyang kalooy, mao nga kanunay Siyang nagakalooy aron tumanon ang matag Pulong nga Iyang gisaad. Kinahanglan Niya nga tumanon kana, sa kanunay, aron nga magapabiling Dios. Kanunay Niyang ginabuhat kini, ang Iyang Pulong kanunay gyud nga nagakatuman sa panahon Niini. Ang Iyang binhi nga Iyang gipugas ibabaw sa yuta. Unsa ma’y Iyang gibuhat? Gipahimutang Niya kini diha sa Pulong, ug usa kini ka binhi. Ug sa matag higayon nga nagaabot ang kapanahonan niini, nagakahinog kana nga binhi, ug dayon nagatungha ang usa ka repormasyon. Ug gisaad Niya kini, ug nagakahitabo mismo kini.

¹¹⁰ Bueno dili man kita takus niining mga butanga. Dili kita takus niini nga mga panalangin sa Dios, tungod kay nanaggawi man kita uyon sa mga butang sa kalibutan, og misubay sa kasaypanan ni Cain. Si Cain, nga nagtukod og maanindot nga altar ug usa ka maanindot nga iglesia, ug gibutangan kini og mga bulak, ug nagdahum siya nga eksaktong mao na kono kadto, “Usa ka pungpong sa mansanas o ubas, o kaha prutas nga granada, o unsa man,” ang gikaon sa iyang amahan ug inahan didto sa tanaman sa Eden, nga mao’y hinungdan nga gipalayas sila didto. Ug mao nga ingon niadto pud ang iyang gihalad pag-usab sa Dios, ug gisalikway kadto sa Dios.

111 “Apan si Abel pinaagi sa pagtoo naghalad ngadto sa Dios og usa ka labing maayong halad kay sa kang Cain.”

112 Ug, sa karong panahon, miingon ang Biblia diha sa Judas, nga, “Sila nangalakaw subay sa agi ni Cain; og nangalaglag diha sa pagsupil ni Korah.” Kita n’yo, “nangalakaw subay sa agi ni Cain,” nanagtukod og mga altar, nanagtukod og mga simbahan, mga denominasyon, og ginahimo kini nga magarbo, dagku, og mas daghan ang mga miyembro kay sa tanang uban pa kanila; nanagpasulod sila og bisan unsa na lang, bisan kinsa nga motambong sa paglukso-lukso, o pagpakiglamano, o pagbautismo sa usa ka pamaagi, o pagsulti sa laing mga dila, o pagsaka-kanaug sa entablado, og pagpalista sa ilang ngalan diha sa libro. Husto kana. Ug dayon usabon ang tinuod nga Kamatuoran nga giwali, ug ilimod Kini. Unsaon man niini pagkahitabo? Matikdi n’yo kung unsa na nga kalamukat ang atong nadangatan! Matikdi.

113 Ug miingon ang Biblia, “Ug sila misubay sa agi ni Balaam, ug nangalaglag diha sa pagsupil ni Korah.” Nangalaglag tungod sa pagsupil! Unsa man ang pagsupil ni Korah kaniadto? “Aba, sa hunahuna mo ikaw lang diay ang balaan nga tawo? Aba, ang Dios. . . Balaan man kitang tanan. Maayo man ang tibuok iglesia. Ang matag. . . Maghiusa kitang tanan, mao kana ang angay natong buhaton.” Dinha sila nangalaglag, tungod niana. Ug takus ra gyud kita niana. Takus kita nga mamaingon niana.

114 Apan ang Dios, nga madagayaon sa kalooy, gipahigawas mismo kita gikan niana nga kagubot ug gipakita kana kanato sa wala pa mahitabo ang maong butang dinhi. Madagayaon sa Iyang kalooy, ug gipadala Niya kanato pag-usab ang rebaybal sa Balaanong pagpang-ayo, ug ang pag-abot pag-usab sa Gahum sa Dios. Sumala sa kasaysayan, wala kono’y rebaybal nga milungtad og lagpas tulo ka tuig. Pero kini nga rebaybal kinse ka tuig nang nagapadayon, padayon kining nagapadilaab og kalayo, sa tibuok kalibutan. Ngano man, tungod ba kay takus kita niini? Tungod ang Dios, madagayaon gayud sa Iyang kalooy, dili tungod kay gitinguha nato kini o tungod kay takus kita niini, diay. Palandunga n’yo na lang kung unsa ba’y nabuhat niini!

115 Sa hunahuna ko ang usa sa mga igsoon n’yong babaye nga taga dinhi mismo sa Phoenix, daghan kaninyo ang nakaila, kang Mrs. Hattie Waldrop, aduna siya’y kanser sa kasingkasing kaniadto. Ug anaa siya sa linya sa pagpaampo kaniadtong unang higayon nga nakaanhi kami ni Igsoong Moore, mga kinse, disetso ka tuig na ang milabay. Ug naghimalatyon na siya kaniadto, tungod sa kanser sa kasingkasing, ug patay na unta siya dugay na nga panahon ang milabay. Apan ang Dios, nga madagayaon sa kalooy, gipadala ang Iyang Gahum nganha kaniya. Ug giluwes Niya ang kinabuhi sa maong igsoong babaye, ug mao nga buhi pa siya hangtud karon. Ang Dios madagayon gayud sa kalooy!

116 Si Kongresman Upshaw usab, nga usa ka halangdong tawo. Sa hunahuna ko siya mao ang presidente, o morag ing-ana, sa—sa Baptist, Southern Baptist Convention, kaniadto, o kaha bise-presidente o morag ing-ana. Gibuhat na niya ang tanan. Maayo man siya nga tawo. Nabuhat na gyud niya ang tanan-tanan nga nahibaloan niya nga buhaton. Miadto na siya sa tanang doktor. Pero ang si bisan kinsa wala na gyu’y unsa mang mahimo para kaniya. Siya’y baldado na gyud. Nag-ampo na pud ang mga ministro para kaniya. Ngani usa na siguro ka galon nga lana ang naibubo sa iyang ulo, ingon nga pagdihog, sa nagkalainlaing mga ministro sa bisan asa.

117 Usa niadto ka gabii, sa Los Angeles, California, samtang nagasaka ako sa pulpito, mitan-aw ako sa nagtipun-og nga mga wheel chair nga halos makaduha, tulo ka pilo ang gidaghanon, kay sa mga nakalingkod didto, puno niini ang tibuok pasilyo, og hangtud sa pinakatumoy. Ug dayon dihay usa ka higdaanan didto nga may usa ka batang babaye ang nagahigda niini, Negro nga batang babaye, ug ang iyang—iyang inahan nagalingkod pud tapad niya. Ug ang akong igsoong lalaki mao’y nagaplastar kaniadto sa linya sa pagpaampo.

118 Ug may ginatan-aw ako, nga wala nasayod kung unsay nagakahitabo. Ug nakita ko ang usa ka doktor, nga nagsul-ob og tortoise-shell nga antipara, nga ginaoperahan ang usa ka negro nga batang babaye, tungod sa sakit sa tutunlan, ug naparalisa na kini. Ug mitan-aw ko sa palibot, sa hunahuna ko, “Asa na kaha kini nga bata?” Wala ko pa man nakita ang maong batang babaye.

119 Pagkataudtaud, atua didto ang, wala na’y paglaum, matahum nga batang babaye nga mga siete o otso anyos ang panuigon, nga mahimong maparalisado sa tibuok niyang kinabuhi. Ug atua sab didto ang iyang inahan nga nagaluhod, og nagaampo. Dayon miingon ko, “Kini nga doktor ang nag-opera sa imong batang babaye,” ug gisaysay ko ang hitsura sa doktor.

Miingon ang inahan, “Husto kana, sir.”

120 Dayon gisulayan niyang dalhon ang maong bata ngadto sa entablado. Gisultihan nila siya nga dili na mosaka didto. Pero gipanguhaan pud nila nga ipa-kalma siya. Niadtong mga orasa nga napa-kalma na nila siya, og sa hunahuna ko, “Bueno, aduna man kita og kahigayonan para iampo ang maong bata.” Pagkataudtaud... Tingali adunay mga tawo nga ania mismo dinhi nga atua usab niadtong gabhiona.

121 Ug sa pagtan-aw ko didto sa mga mananambong, nakita ko kadtong batang babaye nga nagalakaw, didto sa mora og—og mahiktin nga dalan, nga ginakugos ang usa ka munyeka, og ginatabyog-tabyog kadtong munyeka. Bisan giunsa pa pag-ingon sa doktor nga maparalisado na ang batang babaye sa

tibuok niyang kinabuhi; pero ang Dios, nga madagayaon sa kalooy, gipadala didto ang Balaang Espiritu, pinaagi sa usa ka panan-awon, ug kadtong batang babaye mitindog mismo didto, ug siya ug ang iyang inahan naghinawiray og kamot ug milakaw niadtong pasilyo didto, nga nagadayeg sa Dios.

¹²² Didto usab sa luyo naglingkod ang usa ka tigulang nga lalaki, si Kongresman Upshaw, daghan kaninyo ang nasayod na sa iyang testimonyo. Usa siya ka maayong tawo, nga naninguha gyud sa tibuok niyang kinabuhi, saisenta'y-sais ka tuig na siyang baldado nga anaa ra sa wheel chair, pirmi na lang sa higdaanan; nagakratsis siya, nga mao'y iyang ginagamit sa paglakaw, tungod dili na man siya makalakaw pa nga normal. Ug atua siya naglingkod didto, nga nagtan-aw niadtong batang babaye. Ug sa kalit lang, pagtan-aw ko sa gawas ug nakita ko ang usa ka panan-awon. Atua siya, nagalakaw sa ibabaw sa mga mananambong, nga ginaduko ang iyang ulo, nga makalakaw na nga ingon ka normal sama ni kinsa man. Wala pa ko makaila kaniadto kung si kinsa siya.

¹²³ Miingon ko, “Adunay usa ka halangdong tawo nga nagalingkod dinha sa luyo. Nahulog siya sa bagon nga hakotanan og dagami, kaniadtong bata pa siya, ug nabali ang iyang likod. Gipangbangagan nila ang salog, aron malikayan ang bibrasyon, nga mabati sa iyang likod, pagnagalakaw ang mga tawo.” Miingon ko, “Nahimo siyang usa ka halangdon nga tawo, ug siya padayon pa nga nagakahimong halangdon. Aduna siya'y katungdanan sa usa ka dakung kapunongan sa White House.”

¹²⁴ Ug dayon dihay miduol nga lalaki ug miingon kanako, ang ingon, “Si Kongresman Upshaw kana. May nadungog ka na ba bahin kaniya?”

Ingon ko, “Wala pa gyud ko sukad-sukad nakadungog bahin kaniya.”

¹²⁵ Ug busa nagdala ang maong lalaki og dugang nga mikropono didto sa luyo ug nag-istoryahanay sila, didto.

¹²⁶ Dayon misugod ako nga mitan-aw sa palibot, ug nakita ko ang maong Kongresman nga nagaduol, nagalakaw paingon kanako, diha sa usa ka panan-awon, nga ingon na ka himsog ug normal. Ang Dios, nga madagayaon sa kalooy, mao gyu'y nagpatindog kaniya gikan niadtong wheel chair, ug siya nakalakaw nga wala na'y kratsis hangtud sa adlaw nga siya namatay. Ang Dios madagayaon gyud sa kalooy! Sa higayon nga napakyas ang mga doktor, napakyas ang siyensiya, napakyas ang uban pang butang, apan ang Dios madagayaon gayud sa kalooy ngadto kang Kongresman Upshaw.

¹²⁷ Nakahunahuna hinoon ko sa akong kaugalingon. Kaniadtong bata pa ako, mahinumduman ko pa niadtong... Ginatawag ako sa mga tawo karon nga, “usa ka madulomtanon-

sa-mga-babaye.” Ang hinungdan niini, tungod kay nakita ko man gud ang grabe nga imoralidad sa mga kababayen-an kaniadtong bata pa ako. Mao nga ginadumtan ko sila. Ug wala ko na sila ginadumtan karon, tungod kay nasayod ko nga aduna man usab og pipila nga mga maayo. Apan mahinumduman ko pa kung unsa na gyud ang pagka-dautan, og pagka-imoral nila kaniadto. Ug sa hunahuna ko kaniadto, “Naku, ako—ako dili na gyud siguro puedeng makig-uban sa mga tawo. Wala man gud ko’y edukasyon, og dili na gyud ko makabaton og edukasyon.”

¹²⁸ Ug ingon nga usa ka luoy nga bata nagalingkod ako kaniadto, nga wala gyu’y sul-ob nga kamiseta, nga nakasarado og ayo ang akong pang-sapaw nga nakaingon *niini*, gamit ang usa ka perdible, ug init gyud kaayo. Ug miingon ang magtutudlo, “William, wala ba ka giinitan nga nagsul-ob nianang pang-sapaw?”

¹²⁹ Ingon pud ko, “Wala, ma’am, medyo gitugnaw man gud ko.” Ug mao nga gipaadto ko niya sa may halinganang ug nagbutang siya og mga pangsugnod didto sa halinganang, ug mora gyud ko og gidangdang tungod sa kainit. Ug ako—wala man gud ko’y kamiseta niadtong tibuok panahona kaniadto.

¹³⁰ Ug nakahunahuna ko, “Kung maka-kuwarta lang ko, usa ka higayon aron makapalit og gamay’ng, makapalit ko og usa ka ripleng kalibre traynta-traynta,” moanhi ako dinhi sa Kasadpan ug dinhi na magpuyo ug mangayam, sa tibuok kong kinabuhi. Ayaw ko kaniadto nga magkaaduna og unsa man nga kahilambigitan sa mga tawo. Gusto ko lang magpahilayo, tungod kay dili man sila ganahan kanako, ug—ug gusto ko gayud magpahilayo kanila.

¹³¹ Ug dayon sa matag higayon nga moadto ako sa lungsod, aron makig-istorya sa kang kinsa man, nga mga tawo nga akong matagbo sa dalan, nga akong mga kaila. Moingon ko, “Kumusta, John, Jim! Kumusta kamo?”

“Oh, kumusta.”

¹³² Kita n’yo, ayaw nilang makig-istorya kanako, ayaw nilang magkaaduna og unsa man nga kahilambigitan kanako, tungod sa akong amahan ug sa ubang mga nagahimo og whiskey. Ug ako—ako wala man unta nagbuhat og ingon niadto. Wala gyud ko’y unsa man nga gibuhay. Kay kung nagabuhay pa ako ingon niadto sab unta ako.

¹³³ Apan giingnan ko ang akong asawa, dili pa lang dugay, “Nakasab-it sa akong bungbong ang pinakamaayong mga riple nga mahimong paliton.” Oh, ug mahunahuna ko kadtong karaan ug mahugaw kong mga bisti. Pero karong gabhiona aduna ko’y duha o tulo ka maanindot nga amerikana. Ug wala ko’y mga higala? Kinahanglan kong motago didto sa kamingawan, aron mopahilayo sa mga tawo. Unsa ma’y problema, tungod ba kini sa akong personalidad, tungod ba kini sa akong edukasyon? Dili.

Pero ang Dios, nga madagayaon sa kalooy, nakita Niya ako sa ingon niana nga kahimtang ug giluwasa ako.

¹³⁴ Mahinumduman ko pa kaniadto nga ginaagak ako, sama sa usa ka buta nga tawo. Dili na man ko makakita. Ang tanan-tanan nga anaa sa akong atubangan dili na maklaro; mabuta na gyud unta ako niadto sa tibuok kong kinabuhi. Apan ang Dios, nga madagayaon sa kalooy, gibalik ang akong panan-aw. Ngani singkwenta'y-singko anyos na ko, ug maayo pa gihapon ang panan-aw ko. Ang Dios, nga madagayaon sa kalooy, mao lamang ang akong maikasulti.

¹³⁵ Ang iglesia kaniadtong wala pa gikahatagan og paagi alang sa kaayohan. Aduna na unta sila og usa, pero gibalibaran man nila kadto. Apan ang Dios, nga madagayaon sa kalooy, nagpadala kanila og gasa nga Balaanong pagpang-ayo. Mao kana ang Balaang Espiritu sa atong taliwala, nga nagapanghimatuod sa Pulong uban sa naganunot nga mga ilhanan. Ang Dios madagayaon gyud sa kalooy!

¹³⁶ Aduna pa ako'y duha o tulo ka panid niining mga sinulat dinhi, apan dili ko na pagahisgotan ang mga niini, tungod kay ako—nasayod ako nga hapit na ang oras para sa pagsugod sa linya sa pagpaampo. Apan ang Dios madagayaon gayud sa Iyang kalooy!

¹³⁷ Daghan kaninyo ang ania dinhi karong gabhiona, gibalibaran na kamo sa mga doktor. Anaay mga tawo nga nagalingkod nianang mga wheel chair, tingali'g dili na sila makatindog gikan dinha. Tingali magpabilin na lang sila dinha nga ingon niana. Pipila kanila, ang paralisado na tungod sa nagkalainlaing mga kahimtang, sila (dili na gyud) mahimong makalingkawas pa, og wala na'y paagi para kanila nga makalingkawas. Apan ang Dios, nga madagayaon sa Iyang kalooy, naghatag man og pangtubos. Ayaw n'yo kini balibari. Dawata n'yo kini. Adunay mga tawo dinha nga may sakit sa kasingkasing, aduna usab og mga tawo nga may kanser, nga wala na gyu'y mahimo pa ang mga doktor. Mao nga nawad-an na kamo'g paglaum, og wala na'y mahimo, dinhi niining kalibutan.

¹³⁸ Apan ang Dios, nga madagayaon sa Iyang kalooy, gipadala ang Espiritu Santo, ug ania mismo dinhi karon aron panghimatud-an ang Pulong, aron pamatud-an nga Siya mao sa gihapon kagahapon, karon, ug hangtud sa kahangturan. Tungod ba kay takus kita niini? Tungod kay ang Dios madagayaon gayud sa Iyang kalooy! Amen. Karon Mao kini, mao kini ang Persona, mao Kini si Ginoong Jesus. Dili Siya patay, kondili nabanhaw Siya gikan sa mga patay, ug buhi Siya hangtud sa kahangturan.

¹³⁹ Siya mao sa gihapon kagahapon, karon, ug hangtud sa kahangturan, madagayaon gayud gihapon sa Iyang kalooy maingon sa kung unsa Siya kaniadto sa babaye nga adunay

talinugo. Ug milakaw ang maong babaye sa taliwala sa kadaghanan. Wala na'y paglaum para kaniya, gibuhat na sa mga doktor ang tanan-tanan nga mahimo nila. Ang maong babaye adunay talinugo. Naghimalatyon na siya. Ug iyang gihikap ang bistis sa Ginoo. Ang Dios, nga madagayaon sa kalooy, milingi ug gisultihan ang babaye bahin sa kahimtang niini. Ug naayo ang maong babaye niadtong talinugo.

¹⁴⁰ Usa pud ka luoy'ng, mahugaw nga bigaon ang miadto sa atabay usa niadto ka adlaw, aron magkalos og tubig. Wala na'y paglaum. Dili siya puedeng mouban sa mga ulay, gikan sa mga tawo, og wala na'y kapuslanan ang iyang kinabuhi. Ug iyang nahunahuna, "Unsa ma'y kapuslanan nga maninguha pa ako? Sinalikway ako, wala na'y nahibilin para kanako." Apan nakita niya, nga dunay nagatindog didto sa kilid, o nagalingkod sa may kilid sa atabay, ug atua ang usa ka Lalaki nga nagatindog didto. Nga mao'y nagsulti kaniya sa tanang mga butang nga iyang nabuhat, ang Dios nga madagayaon sa Iyang kalooy.

¹⁴¹ Kanang mao ra nga Dios, karong gabhiona, ingon gayud ka madagayaon sa Iyang kalooy, ug mao sa gihapon sa kung unsa Siya kaniadto nga mga adlaw. Madagayaon ang Dios. [Blangko nga bahin sa teyp—Ed.]

¹⁴² Nagatoo ko nga nakapanghatag na kita og duha ka gatus nga prayer kard dinhi, o may mga natawag na kita sa duha ka gatus. Tawagon nato sila ug palinyahon ang mga tawo. Igaampo nato sila.

¹⁴³ Apan sa dili pa nato buhaton kini, tingali'g dunay pipila ka mga bag-ohan dinhi, nga kinahanglan walaon ang tanang mga tuo-tuo. Kini dili baya usa ka tuo-tuo. Kini mao ang kapadayagan sa saad sa Dios. Nagadepende na lang kung unsa gyud ang inyong ginapangita. Walay gahum ang si kinsa man nga tawo. Wala gyu'y gahum ang bisan kinsa nga tawo. Apan kita ingon nga mga magtotoo aduna kita'y pagbulot-an; dili gahum, kondili pagbulot-an.

¹⁴⁴ Adunay tawo nga nangutana kanako, dili pa lang dugay, miingon, "Igsoong Branham, nagatoo ka ba nga aduna ka'y gahum sa pagbuhat niini?"

¹⁴⁵ Miingon ko, "Wala man ko'y gahum, wala gayud, aduna hinoon ko'y pagbulot-an." Ang matag magtotoo aduna man usab og pagbulot-an. Kung imong isalikway kini, nan magpabilin ka lang gyud sa imong nahimutangan. Apan kung imong dawaton kini, mamuhat gyud kini sa labing kadagaya, tungod kay ang Dios madagayaon man sa Iyang kalooy.

¹⁴⁶ Ipananglitan nato ang usa ka pulis nga nagatindog dinha sa kalsada, naglawlaw na ang iyang uniporme, tungod niwang kaayo siya. Ang iyang mga dalunggan natabonan na sa iyang kalo. Ug nagalakaw-lakaw siya dinha sa kalsada kon diin nagadagan ang mga sakyanan, og singkwenta ka milyas kada

oras, nga tulo ka gatus ang kakusgon sa mga makina niini. Wala gani siya'y gahum aron pahunongon ang usa ka bisikleta. Husto kana. Apan sa diha nga patingogon na niya ang pito ug ipataas ang iyang kamot, ug matikdi n'yo ang pag-igiik sa mga preno. Wala man siya'y gahum, apan aduna siya'y pagbulot-an. Tibuok siyudad ang nagapaluyo kaniya.

147 Ug ang usa ka lalaki o usa ka babaye, dili ko igsapyan kung unsa ma'y inyong kahimtang, aduna mismo kamo'y pagbulot-an gikan sa Dios, pinaagi sa usa ka saad, tungod kay Siya madagayaon man ug nagsaad nga pagabuhaton ang labing madagayaon. "Kung magaingon ka niining bukid, 'bumalhin ka,' ug dili magduhaduha sa imong kasingkasing, kondili toohan nga mamatuman gayud kanang unsa ma'y imong giingon, maangkon mo kanang unsay imong giingon." Wala ka ma'y gahum, apan aduna ka og pagbulot-an.

148 Mahinumduman n'yo kaniadtong gisultihan Niya ako didto, miingon, "Mamahimo mong ipahayag ang mga tinago sa mga kasingkasing." Kay Siya... Mahinumdum pa ba mo niana, kamong mga taga Phoenix? Gisaad Niya kini. Kung unsa ma'y Iyang ginasaad, Iyang ginabuhat.

149 Karon dunay pipila kaninyo dinhi nga walay mga prayer kard, ug walay pagduhaduha. Pila man ang mga may sakit ug walay mga prayer kard, ipataas ang inyong mga kamot? Okey. Sige. Kung gusto n'yong mahibaloan, dili ang pagbulot-an... dili ang gahum, kondili ang pagbulot-an sa Pulong, "Ang mga butang nga Akong ginabuhat, pagabuhaton usab ninyo."

150 Nagsaad si Jesus, diha sa Lucas 17:30, nga sa dili pa ang Iyang Pag-abot, mamahitabo ang sama sa panahon ni Moises... o ni Noe, "Sa dihang nanagpangaon sila ug nanag-inom, ug nanagpamana; ug wala nasayod hangtud sa adlaw nga si Noe misulod na sa arka." Siya miingon nga mamahitabo kana nga panahon. Dayon Siya miingon usab, "Maingon sa nahitabo kaniadto sa mga adlaw ni Lot," ug miingon, "mamahitabo kini sa diha nga ginapadayag na ang Anak sa tawo, sa diha nga ginapadayag na ang Anak sa tawo sa kaulahiing mga adlaw."

151 Karon matikdi n'yo kung unsa Siya, kung giunsa sa Anak sa tawo sa pagpadayag sa Iyang Kaugalingon diha sa persona niini nga pagka-Manulonda, nga mao'y Anak sa tawo. Walay pagduhaduha. Gitawag Siya ni Abraham nga, "Elohim." Siya mao ang Anak sa tawo, nga gipadayag ang Iyang Kaugalingon sa wala pa gisunog ang kalibutan sa mga Gentil kaniadto. Giunsa man Niya pagbuhat kadto? Ngadto sa magtotoo. Ngadto sa nagpatoo-too, nagpadala Siya uná og duha ka magwawali aron magwali kanila didto. Apan ngadto sa tinuod nga magtotoo, mitindog Siya nga nakatalikod Siya sa balongbalong, ug miingon Siya, "Abraham." Abram pa man siya sa adlaw...

pipila ka adlaw sa wala pa, kadto. Apan niadtong higayona siya'y Abraham na. "Asa ba ang imong asawa, nga si Sarah?"

¹⁵² Miingon, "Anaa siya sulod sa balongbalong, sa likod Mo."

¹⁵³ Mingon, "Pagatumanon Ko ang Akong saad kanimo. Pagaduawon Ko ikaw."

¹⁵⁴ Oh, usa ka gatus anyos na ang panuigon ni Abraham kaniadto, ug nubenta anyos na si Sarah; apan ang Dios, nga madagayaon sa kalooy, gituman Niya ang Iyang saad. Nahimugso gyud ang maong bata, tungod kay maloloy-on ang Dios, ug puno Siya sa kalooy. Madagayaon Siya sa kalooy. Ginatuman gyud Niya ang Iyang saad.

¹⁵⁵ Matikdi, samtang nakatalikod Siya sa balongbalong, mikatawa si Sarah ug miingon, "Unsaon man pagkahitabo niining mga butanga? Tigulang na ako. Unsaon pa man nako pagkaaduna og kalipay uban sa akong bana, sama sa usa ka batan-ong minyo nga babaye? Aba, usa ka gatus na ang iyang panuigon. Wala na man kami'y pisikal nga pagpakigrelasyon, daghan, daghan nang mga tuig ang milabay. Unsaon pa man pagkahitabo niini?" Ug mikatawa siya tungod niadto.

¹⁵⁶ Ug ang Manulonda samtang . . . ang Anak sa tawo samtang nakatalikod Siya sa—sa balongbalong, miingon, "Nganong mikatawa man si Sarah, nga miingon, 'Unsaon man pagkahitabo niining mga butanga?'"

¹⁵⁷ Unsa man kadto? Miingon si Jesus, diha sa San Lucas 17:30, nga, "Sama sa nahitabo kaniadto sa mga adlaw ni Lot," mao gihapon ang kahintang, sa dili pa pagasunugon ang kalibutan sa mga Gentil, miingon Siya, "igapadayag sa Anak sa tawo ang Iyang Kaugalingon niana nga adlaw." Nagsaad Siya, nagsaad kanato ang Malaquias 4 nga igapahayag kini. Usa ka Mensahe ang moabot nga mao'y magpasig-uli sa mga tawo balik ngadto sa orihinal nga pentecostal nga Mensahe, ug uban ang mao ra nga mga panalangin nga aduna sila kaniadto nga adlaw sa . . . Unsa man kini? Usa kini ka agila nga may duha-ka-pako, ang Bag-o ug ang Daang Tugon, nga ginakapakapa ang mga saad, sa Dios, aron tumanon kung unsa ang mga saad sa Biblia nga gisulti niini nga buhaton. Amen.

¹⁵⁸ Ang Dios, nga madagayaon sa kalooy, dili motugot nga ang Iyang katawhan mahiadto niining denominasyonghong, "mauswagon sa materyal nga mga butang sa kalibutan," ang Kapanahonan sa Iglesiang Laodicea, busa magbuhat Siya og paagi sa paglingkawas. Toohi n'yo kini, mga kaigsoonan. Panalanginan kamo sa Dios. Amen. Ang Dios madagayaon gayud sa kalooy! Ang mga kalooy sa Dios, mao lang kana ang bugtong butang nga akong ginatinguha. Dili ang Iyang pagkamatarung, dili ang Iyang kasugoan; kondili ang Iyang kalooy mao gayu'y akong ginapangamuyo. Kaloy-an unta ako sa Dios. Kitang tanan aduna ma'y ingon niini nga pagbati.

¹⁵⁹ Nagatan-aw ako. Adunay usa ka luoy'ng babaye nga nagalingkod dinha sa tumoy sa lingkoranan. Aduna ka ba'y prayer kard dinha, gining? Wala. Pero ipakita ko kanimo nga ang Dios madagayaon gyud sa kalooy. Ginerbiyos ka og ayo dinhi bag-o lang, dili ba? Grabe ang imong gibati, ug ang imong mga mata nagkagrabe pa gyud. Dili ba husto kana? Husto kana. Karon mausab na kana. Ang Dios, nga madagayaon sa Iyang kalooy, nagapangutana kanimo kung motoo ka ba niini. Karon wala man ka'y prayer kard, wala ka'y bisan unsa; apan dili ka na magkinahanglan niini. Kita mo, tungod sa grasya nga gikahatag kanimo.

¹⁶⁰ Anaay usa ka batan-ong lalaki nga nagalingkod mismo dinha sa atubang, nga dunay usa ka matang sa . . . nagalingkod mismo dinha dapit. Nagaantus siya tungod sa bukol sa iyang lawas. Bag-o pa lang kana nga mitubo dinha, bag-ohay pa gyud. Dili ba husto kana, sir? Husto kana. Wala gani ka mahibalo kung unsa kana. Nahadlok ka niana. Husto kana. Tungod kana sa pagkabun-og, dili ba? Aduna ka ba'y prayer kard? Wala ka'y prayer kard. Pero dili ka na magkinahanglan niini. Ang Dios madagayaon man sa Iyang kalooy!

¹⁶¹ Oh, igsoong lalaki, igsoong babaye, toohi n'yo ang Dios! Ayaw mo pagduhaduha Kaniya. Toohi n'yo Siya! Husto kana.

¹⁶² Aniaay nagalingkod nga usa ka lalaki, nga nagasul-ob og abohon nga amerikana, og naka-antipara. Tan-aw dinhi, sir. Nagatoo ka ba? Ang Dios madagayaon sa Iyang kalooy. Nagalingkod ka dinha nga adunay hernia. Nagatoo ka ba nga mahimong ayohon sa Dios kanang hernia ug himoon ka nga mamaayo na? Nagalingkod ka mismo dinha sa tumoy sa lingkoranan, og nagatan-aw ka kanako. Kung nagatoo ka nga mahimong ayohon sa Dios kanang hernia, buhaton gyud kini sa Dios kung dawaton mo lang kini. Nagatoo ka ba niini? Dawaton mo ba kini? Sige. Maangkon mo kini kung toohan mo lang kini, og makaangkon ka og kalooy. Oo, sir.

¹⁶³ Aniaay usa ka babaye nga nagalingkod dinhi, nagaantus siya tungod sa dili maayo nga sirkulasyon sa dugo sa iyang lawas. Apan kung motoo siya, ayohon gyud siya sa Dios, kung motoo siya niini. Sa hunahuna ko basin og mapalagpas niya kini, sa ingon ka sigurado sama sa unsa mang butang. Kaloy-an unta siya, mao'y akong pag-ampo. Ang maong babaye dili man gud nako halos makita ang iyang. . . Mrs. Riley, nagatoo ka ba nga mahimong ayohon sa Dios kanang dili maayo mo nga sirkulasyon sa dugo? Kung nagatoo ka, nan dawata kini! Amen. Magtoo lamang. Maayo gyud ang Dios, dili ba maayo man Siya, Stella? Oo. Husto kana. Wala ko pa nakita sukad-sukad ang maong babaye sa tibuok kong kinabuhi. Apan, tungod sa Dios, sa Iyang kalooy!

164 Anaay usa usab ka babaye nga nagalingkod, nagalingkod dinha dapit sa luyo, sa luyo mismo, nagalantaw siya mismo kanako. Siya, usab, duna siya'y dili maayo nga sirkulasyon sa dugo, mao gihapon. Nagahunahuna siya mahitungod niini kaniadto pa. Wala ko pa usab nakita sukad ang maong babaye sa tibukong kinabuhi. Ingon nga kining laing babaye nakasinati pud sa mao ra'ng problema, tan-aw kanako. Nagatoo ka ba kanako nga propeta sa Dios, o Iyang alagad? Aduna pud ka'y sakit sa kasingkasing. Kung husto kana, ipataas ang imong kamot. Wala na kana kanimo karon. Ang Dios, nga madagayaon sa Iyang kalooy, nagapadayag nga Siya'y buhi dinhi sulod sa bilding karong gabhiona. Ang Dios nga madagayaon sa Iyang kalooy! Amen.

165 Tingali adunay, daghang mga makasasala ug mga nag-backslide ang gustong motindog, ug moingon, "Ang Dios, nga madagayaon sa Iyang kalooy, malooy unta kanako"? Tumindog kamo. Magaampo ako para kaninyo, kung toohan ninyo nga buut Niyang. . . kon nagtinguha kamo og kalooy karon. Panalanginan kamo sa Dios. Panalanginan ka sa Dios. Panalanginan ka sa Dios, og ikaw pud. Ang nag-backslide, tumindog ka. Ang Dios madagayaon gayud sa Iyang kalooy! Ikaw—ikaw ba. . .

166 Sigurado ko nga dili pa man kamo ingon gyud ka wala na gyu'y pagbati, nga ingon na gyud ang kahimtang, aron dili ninyo makita nga mao kini ang mismong saad sa niining panahon. Siguradong wala pa pud kamo naputos gyud og ayo sa denominasyon, ug uban pang mga butang, aron nga dili ninyo makita nga mao kini ang saad sa niining panahon, ang Dios nga madagayaon sa kalooy.

167 Si kinsa ka man, nga mitindog dinha, magaampo na ako sa dili madugay. Gusto kong motambong kamo sa usa ka iglesia nga nagatoo sa bug-os nga Ebanghelyo ug—ug—ug magpabautismo sa Cristohanong bautismo, og ihatag sa Dios kaninyo ang Espiritu Santo.

168 Aduna pa ba'y gustong motindog, ug moingon, "Ako, buut ko usab nga mahinumduman. Dios, sa Imong kalooy, hinumdumi ako. Wala pa gyud ko nagkinabuhi sama sa angay kong buhaton. Tingali. . ."? Panalanginan ka sa Dios, gining. Ug panalanginan ka sa Dios. Panalanginan ka sa Dios. Panalanginan ka sa Dios. Panalanginan ka sa Dios. Husto kana. "Ang Dios, nga madagayaon sa Iyang kalooy, malooy unta kanako." Panalanginan ka sa Dios, igsoong babaye. Aduna ba'y. . .

169 Pila pa ang mga ania dinhi, nga gustong moingon, "Motindog ako. Gusto kong mahibalo ang Dios nga nagtinguha gyud ako og kalooy. Wala pa ako magkinabuhi nga husto. Nagkinabuhi ako nga ingon *niini* ug ingon *niana*. Napaadto na ako sa bisan asa, apan Iyang kalooy ang akong gitinguha." Panalanginan ka

sa Dios, igsoong lalaki. Aduna pa ba'y, nagaingon, "Ang Dios madagayaon sa Iyang kalooy!" Panalanginan ka sa Dios, igsoong babaye. Panalanginan ka sa Dios, igsoong babaye. Husto kana. Ang Dios madagayaon gayud sa Iyang kalooy! Panalanginan ka sa Dios, usab. Panalanginan kamo sa Dios dinha. Nakita kamo sa Dios. Tindog lang mo.

¹⁷⁰ Moingon mo, "Aduna ba'y unsa man nga kaayohan ang mahimo niini, Igsoong Branham?" Oo. Tindog lang mo ug matikdi n'yo kung unsa gayud ang mahimong kalahian.

¹⁷¹ Kung matinud-anon gayud kamo sa inyong kasingkasing, ang Dios madagayaon sab sa kalooy. "Siya wala magtinguha nga adunay mahanaw, kondili nga ang tanan makadangat unta sa paghinulsol." Ang Dios madagayaon gayud sa Iyang kalooy! Oh Dios, kaloy-i kami.

¹⁷² Bueno pila man ang ania dinhi karon, nga aduna niini nga mga prayer kard? Unsa gani ang mga niini? Mga A ug B, dili ba? Mga A ug B. Ang tanan nga adunay prayer kard nga A, motindog dinhi *nining* dapita, ug ang adunay prayer kard nga B motindog pud dinha sa ilang luyo.

¹⁷³ Aduna ba kaha'y pipila ka mga ministro nga ania dinhi ang gustong motabang kanako. Kung aduna man, kon gusto ninyong moduol, malipay gyud ako sa inyong—inyong tabang dinhi, tungod malipay man sab kami nga mag-ampo, ug mag-ampo—mag-ampo uban kaninyo.

¹⁷⁴ Ania, ang Biblia miingon, "Kini nga mga ilhanan maganunot kanila nga nagatoo." Oo, sir. "Sa Akong Ngalan pagahinginlan nila ang mga yawa, magasulti sila og mga bag-ong sinultihan." Nabuhat ba nato kini? Pinaagi sa grasya sa Dios; dili kita, kondili ang Dios nga madagayaon sa kalooy aron tumanon ang Iyang Pulong. Ang Dios mismo!

¹⁷⁵ Karon, sa mga naka-wheel chair, kung gusto ninyong ipahimutang sila mismo dinhi dapit sa atubangan; igaampo na namo sila dinhi mismo, para dili na sila kinahanglan pang itulod paingon niana, nianang tibuok pasilyo dinha. Sige, tugoti, tugoti ra sila nga moduol dinhi dapit. Iampo namo sila, matag usa kanamo. Ang Dios madagayaon sa Iyang kalooy!

¹⁷⁶ Mahimo ba nga motindog usá kamo diha sa may tuo nga bahin, sa pipila ka minuto? Miuban ba si Igsoong Brown kanimo? [Nagaingon ang igsoong lalaki, "Moanhi siya ugma."—Ed.] Moanhi ugma. Ako—ako—nagdahum man gud ko nga maania siya karon. Asa, asa man si Igsoong Outlaw, asa man si Igsoong Fuller? Ang pipila kanila nga akong nakauban dinhi kaniadtong una kong pag-anhi, makabalik unta mo. Mahinumduman n'yo ba ang kinaraan nga mga linya sa pagpaampo, sa diha nga nagatindog kita dinha kaniadto hangtud nga kinahanglan na ko ninyong hawiran diha sa usa ka bahin, ug aduna pud sa pikas bahin, pag nagakaluya na kaayo ko?

177 Pila man ang nakatambong niadtong mga panagtigum sa sugod kaniadto? Tan-aw mo dinhi. Mahinumduman pa ba ninyo kaniadtong, giingnan ko kamo nga gisultihan ako ni Ginoong Jesus nga, kung magmatinuuron ako, mamahitabo kining mga butanga. Husto ba kana? Wala kita'y ingon nianang butang kaniadto nga adlaw. Apan nahitabo mismo, tungod kay ang Dios madagayaon man sa Iyang kalooy, ug matitud-anon sa Iyang saad. Amen! Moundang na unta ako kaniadto, apan wala ko mahimo. Amen! Dalaygon ang Dios! Alleluyah! "Oh, malipayon kaayo ko nga usa ako diha kanila!" Amen. Oh, my!

Dihay mga tawo halos sa tanang dapit,
 Kansang mga kasingkasing nanagdilaab
 Tungod sa Kalayo nga miabot sa Pentecostes,
 Nga nagputli ug naghinlo kanila;
 Oh, kini'y nagadilaab karon sa kinasuloran sa
 akong kasingkasing,
 Oh, himaya sa Iyang Ngalan!
 Malipayon kaayo ko nga magaingon nga usa
 ako diha kanila.

178 Oh, ako, nga usa ka alaut, makaluluoy, kabus og alaut nga buta, ako kaniadto; apan karon tungod sa Iyang kalooy, sa Iyang madagayaon nga kalooy, makita ko na ang Ginghamarian sa Dios sa ingon ka tataw. Amen. Pagkaanindot gayud sa Iyang mga Sugo!

179 Tindog lang dinha dapit, igsoon ko, gamit ang imong kratsis. Kung dili ka makatindog, okey lang, pabilin lang dinha, monaug ra kami ug mag-ampo para kanimo.

180 Ug karon ang mga A ug B, nga mga prayer kard, ipalinya na dinha sa pikas bahin, ug igaampo na namo sila.

181 Mga igsoong ministro, kamo sa walay pagduhaduha, kung nagatoo kamo sa pagpandong og mga kamot nganha sa mga may sakit, nan duol mo dinhi mismo ug motindog uban kanako sa ibabaw niining entablado. Magaampo kita para sa mga may sakit.

182 Karon kaninyo nga mga nagatindog diha niana nga linya, kung mahimo ninyong toohan nga ania ang Presensiya sa Dios, nga ang Balaang Espiritu ania sa atong taliwala karon, nga eksaktong ginabuhat kung unsay Iyang gisulti nga Iyang buhaton. Kung aduna lang ko'y gahum aron ayohon kamo, buhaton ko gayud kana. Kung aduna lang ko'y unsa nga paagi nga ayohon kamo, buhaton ko gayud kana. Pero wala gyud ko'y paagi. Ako . . . gihatagan lang sa Dios og diyutay'ng gasa.

183 Dili gyud ako usa ka magwawali. Wala gani ko'y igong edukasyon aron mahimong kuwalipikado ingon nga usa ka magwawali, ang ginatawag man gud nga magwawali niining mga panahona, pag aduna—pag aduna ka lang og mga pang-teologo nga kasinatian, ug kinahanglan aduna usab og digri sa pagka-doktor, ug uban pa. Mao nga dili gyud ko mamahimong

kuwalipikado niana. Apan ang Dios, nga nakakita sa akong kasingkasing, ug nasayod nga aduna ko'y gustong buhaton alang Kaniya, buut kong pasalamatan kana.

¹⁸⁴ May usa ka tawo nga miingon kanako niadtong miaging adlaw, miingon, “Sa tan-aw ko usa ka man ka maayong tawo, Mr. Branham, apan nagatoo ko nga sinserong sayup ka lang. Bug-os gayud nga wala ka sa kabubut-on. Nasayod ka ba nga pagahukman ka sa katapusan?”

¹⁸⁵ Ug miingon ko, “Ania, aduna pud ko'y gustong isulti kanimo. Sultihan ta ka nga—nga mahimong husto ka man, alang sa maayong argumento. Kung sayup man ako, diin ako—wala ako nagatoo nga sayup ako; apan kung sayup gyud ko, ug nasayod ko mismo karon nga mabuhi pa ako hangtud sa usa ka gatus ang panuigon, ug pagahukman Niya ako human sa akong panaw, ug sultihan ako, ‘Dili ka takus nga mosulod sa Akong Langit, William Branham. Mahiadto ka sa kangitngitan sa gawas.’ Kabalo ka ba kung unsa? Alagaran ko gihapon Siya sa matag adlaw sa akong kinabuhi hangtud nga motaliwan na ako, binsa pa man. Tungod kay nakadawat man ako og ingon ka daghan sa Iyang mga panalangin nga dili gyud nako takus nga madawat, mao nga Siya’y labaw pa gyud sa kinabuhi alang kanako. Siya ang tanan-tanan nga akong . . .”

¹⁸⁶ Ang tanan-tanan kung unsa ako, ang tanan-tanan nga ginalauman kong mamahitabo, naangkon ko tungod sa Iyang grasya ug kalooy. Ako kaniadto alaut, makaluluoy, kabus, og buta; apan pinaagi sa grasya giayo Niya ako, ug lig-on ug himsog ako, tungod sa grasya sa Dios. Maayo ang akong panan-aw. Aduna ko'y makaon, mainom, og bisan unsa man nga akong gikinahanglan. Wala man Siya nagsaad nga ihatag ang akong mga gusto; kondili ang akong mga panginahanglan.

¹⁸⁷ Ug kung igasalikway man ako nianang adlaw, ug nasayod ko . . . kung dili ko man makita kon asa ako mapaingon. Apan kung nasayod man ako nga sayup gyud ko, ug gipili ako sa Dios aron nga masayup, nan gustohon ko mismo nga magpabiling sayup, ug tungod nga gusto ko man nga buhaton ang Iyang kabubut-on. Tungod kini nga, gihigugma ko Siya mao nga gusto kong matuman ang Iyang kabubut-on. Bueno, usa kini ka kontrobersiyal nga pahayag, apan nagalaum ako nga masabtan n'yo unta kini sa paagi, sa espiritu nga pagsulti ko niini. Kita n'yo, tinguha ko nga matuman ang Iyang kabubut-on. Ngani nangamuyo ako Kaniya og usa ka butang usa ka higayon, og gilingo-lingo lang Niya ang Iyang ulo ingon nga “dili,” pero nagmaya ako mismo kutob sa akong mahimo bisan pa niana nga pareho ra nga nag-ingon Siya og “oo.” Tungod kay, kanunay man kitang angay'ng mangamuyo og, “Ang Imong kabubut-on matuman.” Ang Iyang mga pag-dili sama ra gayud sa . . . kung mao kana'y Iyang kabubut-on, kana gayu'y . . . Mas labi pang maayo kana kay sa Iyang mga pag-oo, kung mao man kana

ang Iyang kabubut-on sa pagbuhat niana. Dinha makita kung gihigugma mo gayud Siya. Amen.

¹⁸⁸ Pag mag-istorya na gani ko mahitungod Kaniya, mora'g dili na ko moundang. Oh, Siya'y pagkatinuod gayud, ingon ka tinuod gayud kanako! Mga higala, Siya—Siya ang tanan-tanan kung unsa ako, ang tanan-tanan nga mamahimo ako, ang tanan-tanan nga ginalauman kong mamahimo ako, nakabasi lang gyud kang Cristo Jesus, og sa Iyang Pulong.

¹⁸⁹ Mapasalamaton ako karong gabhiona tungod sa pagpamatuod sa Balaang Espiritu, tungod sa Mensahe. Nasayod ko nga mahimong, mahimong dunay pipila nga dili-uyon Niini, apan maingon sa gikasulti ko na kaninyo, obligado ako sa usa ka Mensahe. Nahipadayag na ang ilhanan, ug ang Dios dili man magpadala og usa ka ilhanan aron lang ipakita nga Dios Siya. Usa ka Mensahe, usa ka Tingog ang kanunay'ng naganunot sa ilhanan. Nasayod niana ang si kinsa man.

¹⁹⁰ Mianhi si Jesus kaniadto nga may dala nga mga ilhanan ug mga katingalahan. Usa Siya ka halangdon nga Tawo sa dihang namuhat pa Siya og mga ilhanan ug mga katingalahan, apan sa dihang sugod na Siya nga milingkod ug hinay-hinay nga gipahayag ang Mensahe, “Ako ug ang Akong Amahan Usa ra,” oh, grabe, sayup kadto para kanila. Kita n'yo? Apan ang Tingog kinahanglan man nga monunot sa ilhanan.

¹⁹¹ Si Moises pud kaniadto gihatagan og duha ka ilhanan, ug ang matag ilhanan adunay tingog. Husto kana. Nagwali na ko niini dinhi usa ka higayon kaniadto, sa kon asa man, mahitungod sa, *Ang Tingog Sa Ilhanan*. Kini kinahanglan adunay usa—usa ka Tingog sa ilhanan. Nagakausab kini. Ingon na niana kini sa una pa. Kay kung dili, nan dili kini nagagikan sa Dios.

¹⁹² Kung dunay motungha nga usa ka tawong dala ang usa ka lahi og talagsaon nga ministerio, nga makaplagan diha sa Biblia ingon nga Kamatuoran, ug kana nga tawo nagapabilin gihapon nianang karaang denominasyonhong doktrina, kalimti n'yo kana. Wala kana'y pulos! Ang Dios wala nagabuhat og ingon niana. Kana nga butang, dunot na nga manna nga aduna na'y mga anay, o mga waya-way, o unsa man ang tawag n'yo niana, nga kuwarenta, singkwenta ka tuig na ang milabay, og nagasulay gihapon nga mokaon nianang karaang manna nga nahulog pipila na ka mga tuig ang milabay. Ug ang mga anak sa Israel, sa ilang panaw kaniadto, dunay bag-ong manna kaniadto nga nagakahulog matag gabii. Husto kana, mao nga dili mo na puedeng ipapabilin kana.

¹⁹³ Wala man kita nagakinabuhi sa ubang kapanahonan nga miagi na. Nagakaon kita og bag-ong Manna, lab-as nga Manna gikan sa Langit, sa atong panaw samtang nagapadayon kita.

Iduko nato ang atong mga ulo karon.

¹⁹⁴ Ginoong Dios, tinuod gayud Ka, ang Imong Presensiya. Akong mahunahuna ang grasya, Ginoo. Among—among nakita nga namuhat Ka gayud og daghan kaayong mga butang! Nadungog Ka namo nga nagsulti og laing mga dila, nakita Ka nga naghubad niini, pinaagi sa Imong katawhan. Oh Dios, ang makita Ikaw nga nag-ayo sa mga may sakit, nag-abli sa mga mata sa mga buta, gihimo nga makalakaw ang mga piang, makadungog ang mga bungol, makasulti ang mga amang, daw sa unsa gayud Ikaw ka gamhanan ug makagagahum nga Dios!

¹⁹⁵ Ug dayon ang makita nga nagsaad Ikaw niini sa kaulahiing mga adlaw. Bisan pa aduna kami og daghang karnal nga mga pagsundog-sundog, apan nagapamahayag lamang kana nga aduna gyu'y usa ka tinuod nga Dios, kon asa man, nga tinuod gayud. Ug ginaampo ko, Langitnong Amahan, karong gabhiona, nga mamahimo kami nga masayod gayud sa Dios aron among makita nga ania Ikaw dinhi.

¹⁹⁶ Ug kining mga tawo nga nagalinya, pagmoagi na sila niini nga linya, Ginoo. . . ginabuhat namo kini tungod kay, nagsaad man kami kanila. Ug miingon Ka, “Kini nga mga ilhanan maganunot kanila nga nagatoo.”

¹⁹⁷ Aniaiy mga igsoong ministro nga nagatindog dinhi, mga kalalaken-an nga Imo nang gipili, sa wala pa ang pagkatukod sa kalibutan, aron mamahimong kung unsa sila karong gabhiona. Nasayod Ka na, sa wala pa nagkaaduna og kalibutan kaniadto, nga magatindog kami dinhi niining gabhiona, tungod nga wala Ka ma'y kinutoban.

¹⁹⁸ Busa nagaampo kami, Langitnong Amahan, karong gabhiona, nga kining mga tawong masakiton, mga bakul, mga buta, mga piang, mga giut-ot na sa kanser, og kung unsa pa man, pagmoagi na sila niini nga linya, hinaut nga maamgo nila nga ang mismong Dios nga nasayod sa mga tinago sa kasingkasing magaaayo gyud kanila, kung ila lamang kining dawaton, tanawon ug sabton.

¹⁹⁹ Ang tawo nga mitan-aw kaniadto sa tumbaga nga serpente sama sa usa ka sacerdote. . . ingon nga usa ra ka tumbaga, dili gayud siya maayo, tungod kay wala man siya nagkaaduna og pagsabot kung unsa kadto.

²⁰⁰ Ug karong panahona, Ginoo, mao ra gihapon. Kung motan-aw ra sila sa gasa, og maghunahuna nga makatabang kini kanila, nan wala sila nagkaaduna og pagsabot. Kapanghimatuoran mismo kini sa Presensiya sa Dios nga ania dinhi aron mang-ayo. Itugot kini, Amahan. Hinaut nga mahimo kini, sa Ngalan ni Jesus. Amen.

²⁰¹ Buut ko nga ang piyanista, kung mahimo niya, lalaki o babaye, og kung kinsa man, nga moduol dinha ug tugtogon kini nga kanta, “The great Physician now is near, the sympathizing

Jesus,” kung mahimo, kung asa man ang maong piyanista. Karon kana’y . . .

²⁰² Nahinumduman ko ang usa sa akong unang panerbisyo sa pagpang-ayo, didto sa Fort Wayne, Indiana. Nagalingkod niadto ang usa ka batang Amish nga babaye, nga nagatugtog sa piyano, “The great Physician now is near, the sympathizing Jesus.” May usa ka gamay’ng bata nga gidala kanako didto sa entablado, bakul kadto nga bata. Ug samtang nagaampo ako para niadtong bata, milukso gikan sa akong mga bukton kadtong bata ug nagalakaw-lakaw sa entablado. Nakuyapan gud ang inahan. Gipataas pud sa maong lola ang iyang panyo, og misugod sa paghilak.

²⁰³ Ug kadtong batang Amish nga babaye, nga walay unsa man nga nahibaloan mahitungod sa mga Pentecostal, tungod kay miyembro man siya sa iglesiang Amish; apan nagatugtog ra siya. Nakadunghay ang iyang taas nga buhok; mitindog siya diha sa Espiritu ug misugod na siya sa pag-awit og dili-mailhan nga pinulongan, ug ang . . . ug nahiyon ra niadtong awit. Ug ang mga tikla sa piyano padayon gihapon sa iyaha ra, nga ginatugtog ang, “The great Physician now is near, the sympathizing Jesus.” Amen! Siya mao sa gihapon kagahapon, karon, ug hangtud sa kahangturan.

²⁰⁴ Karon mag-ampo kita samtang . . . Karon mag-ampo usab ang tanan nga anaa dinha. Kamong mga nagaduol na sa linya, sa diha nga magapandong na kami og mga kamot nganha kaninyo, hinumdumi n’yo, miingon si Jesus, “Kung motoo kamo niini, mamaayo kamo.” Nagatoo ba kamo niini? Bueno mag-awit kitang tanan karon.

The great Physician now is near,
 The sympathizing Jesus,
 He speaks . . . (Ipiyong lang nato ang atong
 mga mata karon samtang nagaawit kita) . . .
 hearts to cheer,
 Oh, hear the voice of Jesus.
 Sweetest note in seraph song,
 Sweetest name on mortal tongue,
 Sweetest . . . (Amahang Dios, manglihok Ka
 nganha sa mga tawo karon) . . . sung,
 O Jesus, blessed Jesus.

²⁰⁵ “The great . . .” Karon samtang nagaduol kamo karon, ania Siya. Salig mo sa akong gisulti, o toohi ninyo mismo kini, ania gyud Siya. Karon mag-ampo ang tanan dinha para sa mga tawo.

²⁰⁶ [Nagaampo si Igsoong Branham ug ang mga ministro para sa mga may sakit samtang si Igsoong Borders nanguna sa kongregasyon sa pag-awit. Blangko nga bahin sa teyp—Ed.]

O Lord, I believe; O Lord, I believe;
 All things are possible, O Lord, I believe.

207 Ang tanan nga nagatoo, ipataas n'yo ang inyong kamot nga nakaingon *niini*, og moingon, “Nagatoo ako.” [Nagaingon ang kongregasyon, “Nagatoo ako.”—Ed.]

208 Aniyang usa ka lalaki nga nagalingkod dinhi. Ang hinungdan nga nadugay ako; sa pag-istorya, naghimalasyon na siya tungod sa kanser. Nagasungkod na lang siya. Wala na gyu'y paagi sa kalibutan para mabuhi ang maong lalaki, gawas sa Dios. Nalukop na sa kanser ang iyang tibuok tinay, ug siguradong mamatay siya kung dili pa tungod sa kalooy sa Dios. Ug unta ako gayud mahimong . . . [Blangko nga bahin sa teyp—Ed.] . . . pulong nga pangpadasig para niining lalaki.

209 Ikaw, nasayod ka man nga wala na gyu'y mahimo ang mga doktor para kanimo karon. Milagpas ka na niana, kita mo. Ug ang imong . . . Aduna ka na lamang og usa ka paglaum, ug mao kana si Cristo, kita mo. Ug, igsoon, ikaw . . . mamatay man ko usa ka adlaw, usab. Siguradong motaliwan ka gayud, kung maglangay pa si Jesus. Siguradong matagbo ko ikaw didto, sa pagtindog mo didto sa Korte sa Paghukom. Ug niining gabhiona . . .

210 Kabalo mo, sama sa telebisyon, marekord sa telebisyon sa matag higayon nga ilihok nato ang atong tudlo, ang bisan unsa, nakarekord kana. Ang matag pulong nga atong isulti, nakarekord usab. Karon, kita n'yo, napamatud-an kana sa telebisyon. Karon, ang telebisyon dili man makahimo og hulagway, ginapaagi lang niini ang sibya ngadto sa telebisyon. Kita n'yo, dili kini makahimo. Aduna na'y telebisyon kaniadtong milakaw si Adan sa ibabaw sa yuta, aduna na'y telebisyon sa dihang—sa dihang milabang si Moises didto sa Dagat nga Mapula, aduna na'y telebisyon sa dihang atua si Elias didto sa Bukid sa Carmelo, kita n'yo, apan bag-o lang nila kini nga nadiskubrehan karon. Kita n'yo? Ug karon sa tanang dapit ako . . .

211 Ang matag lihoc nato, ug ang matag tingog, nakarekord kini ingon nga atong panubagon didto sa Paghukom. Ang matag lihoc nato siguradong atubangon gyud nato didto. Kinahanglan kong panubagon ang mga pulong nga akong ginasulti kaninyo, ingon nga usa ka ministro. Mao nga kinahanglan kong isulti kini, tungod kay papanubagon man ko sa Dios tungod niini.

212 Karon kung mahimo ko pa, giayo na unta ta ka; tungod kay mamahimong gamay na lang ang imong panahon, kung dili pa tungod sa Dios. Karon, minaug ako ug nag-ampo para kanimo, sa tanang nahibaloan ko nga buhaton. Igsoon, kung aduna ma'y bisan unsa sa kalibutan, nga mahimo ko para sa usa ka tawo nga anaa niana nga kahimtang, buhaton ko gayud.

213 Ug pangutan-on ta ka, kita mo. Ikaw—ikaw—naayo ka na, tungod kay miingon man si Jesus nga naayo ka na. Kita mo, “Tungod sa Iyang mga labod kita nangaayo.” Karon kung

mahimo mo, gikan sa kinahiladman sa imong kasingkasing, nga dawaton kana, dili ka mamatay karon, kondili mabuhi ka.

²¹⁴ Karon, kita n'yo, nasayod kita nga dunay telebisyon nga nagaagi niini nga lawak karon. Nasayod kita niana. Dili lang nato makita kini. Dili kita makakita niini, tungod ang atong mga mata wala man gimugna para niini, ang atong mga igbabati dili pud makamatikod niini. Magkinahanglan pa og usa ka hinimo nga tubo, o kung unsa man, nga bildo, aron makita kini.

²¹⁵ Mao usab ang Dios nga ania mismo karon. Dili nato Siya makita, apan nasayod kita nga ania Siya mismo. Si Jesus Cristo mao ra sa gihapon. Tan-awa, gipahayag gayud Niya ang Iyang Kaugalingon, maingon sa ginabuhat Niya Mismo. Karon, mahitungod sa pagpang-ayo, kung nagatindog Siya mismo dinhi karon, wala na Siya'y angay'ng buhaton pa para kaninyo, kita n'yo, wala na'y uban pang butang. Kung nagatindog ang Anak sa Dios mismo dinhi, ingon nga Siya gayud, ania Siya, apan wala na Siya'y angay'ng buhaton pa para kaninyo, tungod kay gipaila na man Niya ang Iyang Kaugalingon dinhi. Kita n'yo? Ug ania Siya mismo karon, nga mao ra sa gihapon, aron ayohon kamo ug himoon nga mamaayo na.

²¹⁶ Ug giingnan ako nianang gamay'ng babaye dinha, miingon, "Gipangamuyo mo ang panalangin, ug nagpropesiya ka o ingon niana," mahitungod kaniya, nga makabaton unta siya og usa ka bata, bisan naka-wheelchair na siya. Ug naangkon gyud niya, nakabaton siya og anak.

²¹⁷ Ug karon ania ang luoy'ng babaye nga nagalingkod. Bueno naoperahan siya sa goiter, ug naparalisado siya tungod niana. Bueno, daghan na kaayo kitang nakita og ingon-anang mga butang nga nagakahitabo. Karon, pinalanggang, igsoon, nasayod ako nga usa ikaw ka tinuod nga Cristohanon. Ang hinungdan nga gipalingkod ka sa Dios dinha, wala ako mahibalo. Sa hunahuna ko, siguro, tungod kay aduna ka'y. . . Pagtoo, ikaw—nagatinguha ka nga magkaaduna og pagtoo, aron nga makalingkawas na dinha, kita mo; apan karon ania, dili lamang nato tinguhaon nga magkaaduna niini, kondili batonan gayud nato kini karon, kita n'yo, makadangat gayud kita—kita dinha. Mao lang gayud kana, magasugod na kini dayon karon, ug mamaayo gyud kita. Ug kamong mga nagalingkod dinha nianang mga wheel chair, unsa man, o—o unsa ma'y inyong kahimtang, hinumdumi lang ninyo nga ania si Cristo.

²¹⁸ Karon moingon mo, "Aduna ba, nakita mo ba ang akong hulagway nga miagi dinha." Oh, oo.

²¹⁹ Bisang mga Pulong ni Jesus Cristo, nga Iyang gipamulong kaniadtong ania pa Siya sa yuta, nagaagi mismo niini nga lawak. Kini dili gayud mahanaw. Pila man ang nahibalo nga siyentipikanhong tinuod kana? [Nagaingon ang kongregasyon,


“Amen.”—Ed.] Bueno, unsa man kana? Ug gikuha sa Espiritu kanang Pulong nga nahisulat, ug gipadayag Kini. Oh, himaya!

²²⁰ Ania Siya. Ania Siya karon mismo, ang Ginoo. Kita gayu’y . . . Nakakita na kita og ingon ka daghan, og daghan na kaayo nga Iyang nabuhat, hangtud nga medyo, kabalo mo, medyo nagakalimot na kita niini. Kung maamgo lang nato, dili ang usa ka butang nga tinumotumo lang, usa ka pang-teologo nga termino; kondili ang kapanghimatuoran gayud nga Iyang gisaad nga ipasundayag Niya ang Iyang Kaugalingon sa niini nga adlaw, ania Siya nga ginapahayag kini sa atubangan nato mismo karon. Pagkaanindot nga butang! Dili ba pagkaanindot niana? [Nagaingon ang kongregasyon, “Amen.”—Ed.]

²²¹ Karon magtoo kamo. Motoo ka ba niini? Toohi nga dili ka mamatay. Mabuhi gyud ka, ug pagapasidunggan mo ang Dios. Pagapasidunggan mo ang Dios. Nabautismohan ka na ba? Usa ikaw ka Cristohanon, dili ba? Ug usa gyud ikaw ka Cristohanon. Bueno, nagatinguha ka nga mabuhi pa alang sa kadunggan sa Dios. Kung ingon-ana lakaw og mabuhi gyud ka, igsoon ko. Sa Ngalan ni Jesus Cristo, mabuhi ka!

²²² Ug, igsoong babaye, nagatinguha pud ka nga makalakaw alang sa kahimayaan sa Dios, ug para mag-amuma sa imong bata; kung ingon-ana lumakaw ka, igsoon, sa Ngalan ni Jesus Cristo!

²²³ Kamo, ang matag usa kaninyo, kamo usab, sa Ngalan ni Jesus Cristo! Ayaw n’yo kalimti kining Westward Ho Motel dinhi karong gabhiona, tungod kay napaila gayud ang Presensiya sa Dios dinhi. Wala Siya’y pinalabi nga tawo. Gusto lamang Niya nga motoo kamo. Nagatoo ba kamo Kaniya karon? [Nagaingon ang kongregasyon, “Amen.”—Ed.] Amen. Panalanginan kamo sa Dios.

²²⁴ Iduko nato ang atong mga ulo karon. Wala ko mahibalo kung kinsa ba’y ilang napili, nga—nga mao’y magpapauli. Igsoong Mushegian, umari ka na, igsoon. Siya ang magpapauli kanato diha sa pag-ampo. Panalanginan kamo sa Dios. 

ANG DIOS NGA MADAGAYAON SA KALOoy CEB65-0119

(The God Who Is Rich In Mercy)

Kining Mensahe ni Igsoong William Marrion Branham, una giwali sa Ingles niadtong Martes sa gabii, Enero 19, 1965, para sa Full Gospel Business Men's Fellowship International sa Westward Ho Hotel sa Phoenix, Arizona, U.S.A., gibalhin gikan sa magnetikong teyp rekording ug gipatik nga walay nakulang sa Ingles. Kining Cebuanong hubad pinatikan na ug gipang-apodapod sa Voice of God Recordings.

CEBUANO

©2020 VGR, ALL RIGHTS RESERVED

VOICE OF GOD RECORDINGS

P.O. Box 950, JEFFERSONVILLE, INDIANA 47131 U.S.A.

www.branham.org

Pahibalo Bahin Sa Katungod Sa Pagmantala

Ang tanang katungod sa pagmantala iyaha lamang sa tag-iya. Kining basahona mahimong i-print sa printer sa balay alang sa personal nga gamit o sa pagpang-apod-apod, nga walay-bayad, ingon nga usa ka instrumento sa pagpakaylap sa Ebanghelyo ni Jesus Cristo. Kining basahona dili mahimong ibaligya, kopyahon nga pang-dinaghan, i-post sa website, i-store sa usa ka retrieval system, ihubad sa ubang pinulongan, o gamiton sa pagpangayo og mga amot nga walay ginapagawas nga kasulatan nga pagpahanugot gikan sa Voice Of God Recordings®.

Alang sa dugang nga mga kasayuran o alang sa uban pa nga ginapang-apod-apod nga mga materyales, mahimong kontakon ang:

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org